

ASO LULU, 22 OKETOPA 2014

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: E manatu o lea ua maea ona momoli mea i Matautu-Sa ma ua tatou lagona foi ma le agaga faafetai le alofa ma le agalelei o le Atua, ona ua mafai ona tatou potopoto i le manuia ma le soifua laulelei le paia o le Maota Fono i ona tulaga faalupelupe. Ua vaai atu o lea ua atoa tagi le paia o le Maota i ona tulaga mamalu ma ona paia sauoo e masani ai, i le alafai mai i faguga lelei o le paia i lau Afioga i le Taitai o le Malo ma lau Kapeneta, aemaise foi o le soisoi fiafia mai o le Taitai o le Itu Agai i lenei taeao ma lea tala-na-atoa o lo tatou Maota nei. Ua faamalo atu le soifua manuia, ua faamalo le onosai. O le agaga ma le faamoemoe, ia faaauauina a tatou galuega i lenei aso ina ia papa aveloa a tatou polokalame ua uma ona faataatia mo lenei masina aua le lauliliuina o a tatou Tulafono Tau Faaofi, aemaise o le tele o a tatou galuega ua uma ona faatulagaina aua a tatou Fonotaga.

O lea; alo maia o le a faasolo a tatou galuega ma le talitonuga o le a tatou galulue faatasi aua le faatinoina o a tatou galuega mo se taunuuga lelei.

E faatalofa atu foi i le tapuaiga a lo tatou atunuu i le paia maualuga aua le paia i Aiga ma Tama, o Tama ma Aiga aemaise Faleupolu tofia o Samoa, le paia i le Aufaigaluega Paia a le Atua o lo o outou tatalo ma nonomanu; ua malo le tapuai mai. Ia po mai laia le fala ma ula le mulila a o alo lau Palemene i le faatinoga o galuega i lenei aso.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P.2014/2015 Nu.139, Lipoti Faaletausaga a le Matagaluega o Punaoa Faalenatura ma Siosiomaga 2012-2013.
2. P.P.2014/2015 Nu.140, Tali atu a le Malo i le P.P.2013/2014 Nu.117, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P.2013/2014 Nu.72, Lipoti Faaletausaga a le Matagaluega o Fesootaiga ma Faamatalaga Tekonolosi mo le Tausaga 2010-2011.
3. P.P.2014/2015 Nu.141, Tali atu a le Malo i le P.P.2013/2014 Nu.110, Lipoti a le Komiti o Mataupu tau le Va i Fafu, Fefaatauaiga ma Tupe Maua i le P.P.2012/2013 Nu.67, P.P.2012/2013 Nu.68, P.P.2012/2013 Nu.69, P.P.2013/2014 Nu.70, Lipoti Faaletausaga a le

- Matagaluega mo Tupe Maua mo Tausaga Faaletupe 2008/2009, 2009/2010, 2010/2011, 2011/2012 & 2012/2013.
4. P.P.2014/2015 Nu.142, Lipoti o le Malaga Faa-Palemene a Samoa i le Palemene o Ausetalia, Palemene o Victoria ma le Palemene o Tasmania, 21-26 Setema 2014.
 5. P.P.2014/2015 Nu.144, Tali atu a le Malo i le P.P.2013/2014 Nu.108, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P.2012/2013 Nu.75, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe faaiiuna aso 30 Iuni 2011.

TUUIINA ATU O LIPOTI A KOMITI FILIFILIA

Na tolaulauina e le Failautusi le Lipoti a le Komiti Filifilia ua faataatia i luga o le Laulau a Fono e tusa ai ma le T.T.51.

1. P.P.2014/2015 Nu.143, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P.2014/2015 Nu.80, Lipoti Faaletausaga a le Iunivesite Aoao o Samoa i le Tausaga Faaletupe 1 Iulai 2011 faaiiuna 30 Iuni 2012.

TULAFONO TAU FAAOFI MO LOIA MA LE FAATINOGA O GALUEGA FAA-LOIA 2014 – faitauga faatolu

FOFOGA FETALAI: Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi mo Loia ma le Faatinoga o Galuega Faa-Loia 2014 i lona faitauga faatolu.*

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina ai le Tulafono Tau Faaofi i lona faitauga faatolu ma ua faapea ona pasia le Fono Aoao Faitulafono.

TULAFONO TAU FAAOFI O TEUTEUGA O LE TULAFONO O LE FAAFOEGA O LAFOGA 2014 – faitauga faatolu

FOFOGA FETALAI: Tulai mai lau Afioga i le Minisita mo Tupe Maua.

Tofa Hon TUILOMA LAMEKO (Minisita mo Tupe Maua): Lau Afioga i le Fofoga Fetalai faapea sui usufono mamalu o le Palemene aemaise foi le faafofoga tapuai mai a le paia ma le mamalu a lo tatou atunuu, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoga o Lafoga 2014 i lona faitauga faatolu.*

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nu'u ma Afioga ma Agafesootai.

Na faamaonia le lafo ma faitauina ai le Tulafono Tau Faaofi i lona faitauga faatolu ma ua faapea ona pasia le Fono Aoa'o Faitulafono.

TULAFONO TAU FAAOFI O TEUTEUGA O LE TULAFONO O LE FAAMASINOGA A LE LALOLAGI MO SOLITULAFONO FAAVA O MALO 2014 – faitauga faatolu

FOFOGA FETALAI: Tulai mai lau Afioga i le Palemia.

Susuga Hon TUILAEP'A FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faamasinoga a le Lalolagi mo Solitulafono Faava o Malo 2014 i lona faitauga faatolu.*

Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nu'u ma Afioga ma Agafesootai.

Na faamaonia le lafo ma faitauina ai le Tulafono Tau Faaofi i lona faitauga faatolu ma ua faapea ona pasia le Fono Aoa'o Faitulafono.

TULAFONO TAU FAAOFI O AUAUNAGA LAGOLAGO FAA-SOIFUA MALOLOINA 2014 – faitauga faatolu

FOFOGA FETALAI: Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Auaunaga Lagolago Faa-Soifua Maloloina 2014 i lona faitauga faatolu.*

Faaluaina e le Minisita mo Faatoaga ma Faigafaiva ma le Minisita mo Punaoa Faalenatura ma le Siosiomaga.

Na faamaonia le lafo ma faitauina ai le Tulafono Tau Faaofi i lona faitauga faatolu ma ua faapea ona pasia le Fono Aoa'o Faitulafono.

TULAFONO TAU FAAOFI O TEUTEUGA O LE TULAFONO O FOMAI 2014 – faitauga faatolu

FOFOGA FETALAI: Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fomai 2014 i lona faitauga faatolu.*

Faaluaina e le Minisita mo Punaoa Faalenatura ma le Siosiomaga, le Minisita mo Aoga, Taaloga ma Aganuu ma le Minisita mo Faatoaga ma Faigafaiva.

Na faamaonia le lafo ma faitauina ai le Tulafono Tau Faaofi i lona faitauga faatolu ma ua faapea ona pasia le Fono Aoaofaitulafono.

TULAFONO TAU FAAOFI O TAGATA TOMAI TAU PALAMA 2014 – faitauga faatolu

FOFOGA FETALAI: Tulai mai lau Afioga i le Minisita mo Galuega, Felauaiga ma Atinae Eseese.

Afioga Hon MANUALESAGALALA ENOKATI POSALA (Minisita mo Galuega, Felauaiga ma Atinae Eseese): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Tagata Tomai Tau Palama 2014 i lona faitauga faatolu.*

Faaluaina e le Minisita mo le Soifua Maloloina, le Minisita mo Aoga, Taaloga ma Aganuu, le Minisita mo Punaoa Faalenatura ma le Siosiomaga ma le Minisita mo Leoleo ma Falepuipui ma Auaunaga o Tinei Mu.

Na faamaonia le lafo ma faitauina ai le Tulafono Tau Faaofi i lona faitauga faatolu ma ua faapea ona pasia le Fono Aoaofaitulafono.

TULAFONO TAU FAAOFI O TEUTEUGA O LE TULAFONO O LE PULEGA O TUPE A LE MALO 2014 – felafolafoaiga faaauau i luga o le faitauga faalua

FOFOGA FETALAI: E tolopo le Fono i le aso ananafi o lo o faaauau felafolafoaiga i lenei Tulafono Tau Faaofi ma e manatu ua malamalama le folasaga a le Taitai o le Malo i le aso ananafi, ae e i ai nai sui usufono na tutulai mai. O le a avatu pea le avanoa pe ua faamalieina? A leai o le a avatu loa le fesili.

O le avanoa mulimuli lea o le a tuu i le Sui Taitai o le Itu Agai.

Tulai mai lau Afioga i le Sui Taitai o le Itu Agai.

Afioga Hon AEAU PENIAMINA LEAVASEETA (Falealupo): Lau Afioga i le Fofoga Fetalai, ou te tulai atu lava i le agaga faaaloalo i le pau o le Maotaga nei i le usuia o le Fono a le atunuu. E faatalofa atu foi i le faafofogaaga a lo tatou atunuu.

Ou te tulai atu lau Afioga i le Fofoga Fetalai e fia fai se sao puupuu e tusa ma lenei Tulafono Tau Faaofi, o le Tulafono Tau Faaofi o le Pulega o Tupe a

le Malo 2014. Ou te talitonu e pei ona malele le Afioga i le Palemia i le aso ananafi i le taua o le Tulafono Tau Faaofi lenei, leaga o i e auga uma i ai faiga faavae o le faasoaina o tupe a le Malo, ma e mafanafana foi lenei sui usufono. E taua le Tulafono ma lē o le a faagaoioia le Tulafono, faatinoia i ona o'oo'oga o le Afioga lea i le Palemia, ia faamalo. Ua logona le Maotaga ma le faafofogaaga a le atunuu i le agaga o faiga faavae a le Malo i le faasoaina o ana tupe – ma sa faamuamua le fuaitau lea e faamamafaina, e sao lelei le Afioga i le Palemia. O le faasoaina o tupe o Malo, e le faigofie, e fuafua, lona uiga e plan, somehow ae le definite ae le mautu, fuafua ona aumai lea ona faatino lea o galuega, a alu alu ua e le lava, ia toe oomi atu, e faapena. I lau maitau la i le aso ananafi, o le umi ia ona fofogaina i le malelega a le Afioga i le Minisita o Tupe po o le Palemia le upu lea o le fuafua, fuafua tataua, fuafua lelei, fuafua. A o na fuafuaga i so o se vaega lava o tupe faaalu, e le mautinoa, a alu alu la ua aea ona toe.....lea, e taua le sao, ou te talitonu e lagolagoina uma lava e le mamalu o le au faafofogaaga lea fuaitau. O le agaga la o se matou taumafai atu a lenei usugafono i se tuualalo, e le o se fautuaga, o aga ia faale-Itumalo lenei, o lena e i ina le tofa, o le tuualalo, faataatia ane i ina. I lau maitau i fatia ua mavae i le tatou Malo i tupe faaalu, masalo na sau lava i le plan lea, fuafua, a o ona tafatafa ane e leai la ni ona tua, e leai se faatapulaaina, aua e manaia le aumai fuafua pasia-gofie, a o ona tua, o le vevesi ia pe a i ai ni faafitauli, e mafua mai i le mea lea o le fuafua, aua ua uma ona avatu le fuafuaga, ua le fetau ia le mea lea ua fai. O le tuualalo la a lenei usugafono, leaga o le mea lea o le fuafua, o le sipelaina o le upu lea i lau vaai ma aga ma tulaga ua tatou vaai nei ma tatou molimauina, e le o ni upu e aveane ai upu ia. O le fuafua, f, u, a, f, u, a, fuafua, ae mafai foi la i le upu lava lea e tasi ona faapea, f, a, u, f, a, u, faufau, e o faatasi la upu ia e lua, ia se i.....

FOFOGA FETALAI: Malie le sui usufono, se i avatu le faamalalamamaga sao o le fuafua.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e manaia le aoga a le sui usufono, aemaise lava o lea lava ou te iloa e lua ituaiga PI, o le isi o le Pi Tautau o lea e aoao ai isi, a o isi e aoao i le fa, fe, fi, lo, lua. O lea la ou te matau atu i le fuafua lea, e fua, tasi, toe fua, lua, e lua la fua. E lua la fua?

FOFOGA FETALAI: Ia faaauu le saunoaga le sui usufono mamalu.

Afioga Hon AEAU PENIAMINA LEAVASEETA: Lau Afioga i le Fofoga Fetalai, aua e taua ia o lea upu aua o le upu e silafia uma e amata mai lava i le Kindergarten e oo i luga i taimi foi o failauga o taimi o tu ma aga, e malamalama lelei i upu ia, o le fuafua ma le faufau, na ona feliuai lava.

I tala o le ea i lenei vaitau, e mamao matou ae matua malamalama ma lagona mai i Falealupo mea ia o lo o tutupu. O lo o i lumamea le lafo i le tulaga lea i lipoti e le i oo mai e le i tali mai i ai le Malo ma le vaaiga a nisi foi o komiti o le Palemene. I le vaai la i ai, pei lava o sa matou upu amata o le tuualalo, e le o se fautuaga, o lena e i ina le tofa, a o le tuualalo e faapea, vaai i fuafuaga ia leaga e filo ai i totonu pe a soona tuufau e filo ai i totonu pe a faaletonu le faufau, o le faufau, o ni fuafuaga a se vaega foi lea tai pei o lo o

moomia ia pe tatou te....ia o mea lava e tutupu i le soifuaga nei, e le mafai ona fai mai se isi e le tofo, o la e tupu. A lea na tupu? A lea sa tupu? A lea na tutupu? A lea o lo o tatou aafia ai? Ioe. Na ona lafo atu faapena. Aua o mea ia e aliali mai i le fuafua lea, na ona sese lava, e le selau afe, e miliona, o lona uiga e sese le fuafuaga. O le mea lea e le alualua le agaga lea e fai atu. A o fuafuaga ia ma tupe e aumai ma pasia e le Palemene, amanaia le tulaga lea, a sasi le fuafua, po o ua ova le fuafua, vaai leaga e i ai i totonu le mea e tau o le faufau. O le mea lena e faigata tele, leaga o lea na tupu, o lea ua tatou aafia ai ia ma lafo atu i le Pulega. O le mea lea ou te lototele ai ma ou fiafia, o lau Afioga i le Taitai o le Malo, a sasi le Tulafono lea i ni mea e toe tutupu mai, e afua mai i i. Manuia le Fono.

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai.....

FOFOGA FETALAI: Malo faafetai saunoa. Ia o lea ua malele le Sui Taitai. E te toe fia saunoa le Taitai o le Itu Agai o lea sa e saunoa ananafi?

Afioga Hon Palusalue Faapo II: Lau Afioga na ou tulai atu ananafi ae fai mai se i oo i le aso, o lea la ua ou.....leaga e taua tele le Tulafono.

FOFOGA FETALAI: Ia.

Afioga Hon Palusalue Faapo II: A na faapea na lavea i se saunoaga, ia ou te le tulai. Na ona faanoi atu pe.....

FOFOGA FETALAI: Ia o le a avatu pea leaga o lea ua maua lou finagalo ona o le saunoaga a le Sui Taitai. Ia tulai mai e faapuupuu mai ona sosoo mai ai lea ma le sui usufono mo Aana Alofi Nu. 3, ia ma se tasi o sui usufono mo Salega, Afioga Afualo Wood Uti Salele lea sa taumafai mai ananafi.

Tulai mai le Taitai o le Itu Agai.

Afioga Hon PALUSALUE FAAPO II: Ia faafetai tele lava i lau Afioga mo le avanoa ua tuuina mai, ona o lena Tulafono o se Tulafono Tau Faaofi tele, aemaise lava i tulaga o pulega o tupe a se Malo. Aua o lea ua aumai nei, ia o le malosiaga lea o le a ave i le tagata e toatasi, o ai? o le Minisita o Tupe. O le taimi nei o lo o i le Afioga i le Palemia. E fuafua ai ia aemaise le faataatiaga ina ia pulea lelei tupe a lo tatou atunuu. O lea la ua taatia mai, pau lava le atugaluga ia te au, o le upu masani foi lea a le atunuu, 'o le tele o sulu e tele figota e maua.' Pei o le mea lea e agai ai nei, lea ua...i le matafaioi a Minisita taitasi ma Pulega ma Matagaluega. O lea ua foliga mai o lea ua tuufaatasi i i e tusa ai ina ia mafai ai ona pulea lelei ma silasila i lona tulaga aoatotele ma faatonutonu ai ia le tulaga i pulega o a tatou tupe aemaise o atinae tetele a le atunuu. Pei o le tulaga lena, aua e tele lava o mea sa aumai iinei, o lea lava e aumai i totonu o le Palemene, pasia atu ai. A o lou atugaluga lena e popole ai, ia avea le Tulafono lena ma Tulafono Tau Faaofi e maua ai malosiaga e pulea ai lava e le tagata e toatasi ia le faagaioioiga ma le faagasologa o tupe a lo tatou atunuu.

O le isi tulaga lea e maoti mai i i i matafaioi o le a feagai ma le Minisita o Tupe, o le faataatiaga lea o le pulega o lo o i ai o aitalafu a le Malo, aua o le

mea lava lea o lea e tata logo atu ai pea Masefau i lenei itu, ina ia silasila totoa i aitalafu a le atunuu, aitalafu aua o lea lava e faatageno a tatou saunoaga, matua nono mai tupe e fai ai manu o mafai i le taimi lenei. Ia a o lea lava e valuvalusia pea aa o le fau i lau Afioga i le Palemia o le Minisita o Tupe, se i silasila i ai i le tulaga lea, talosia o aumai i i ma faapitoa i le Tulafono Tau Faaofi lenei ina ia silasila totoa i ai i a tatou aitalafu, ina ia faatonutonu lelei ma fuafua lelei i le tulaga ua i ai nei. E tele ia fautuaga ua aumai mai i a tatou paaga i fafo o lo o maua mai ai a tatou fesoasoani, aemaise lava o le Faletupe o le Lalolagi, Faletupe o Asia ia o lo o fautua mai ai pea ina ia silasila totoa lo tatou Malo i le maualuga ua i ai nei a tatou aitalafu, e fuafua i le GDP a lo tatou atunuu, o lea ua savalivali atu nei i luga i le 70%, e le o se tamai faatusatusa lea e fuafua i le tamaoaiga ma le tupe o lo o taamilo i totonu o le tatou atunuu. A o le Tulafono Tau Faaofi la lea ua faataatia mai nei, ia o le a talitonu, ia o le a silasila totoa i ai lau Afioga i le Palemia o le Minisita o Tupe, aemaise ina ia faataatia lelei mai ia faamaumauga ma tulaga faapena ina ia manino ai ia lo tatou atunuu i tulaga o aitalafu a lo tatou Malo.

Lau Afioga i le Fofoga Fetalai, na ona avatu pea o se tuualalo i lau Afioga i le Minisita o Tupe ina ia silasila totoa i ai, aua ua tele a tatou atinae ua faia ma ua maimau ai le tele o tupe, tasi lea tulaga lelei o lea ou te tilotilo atu i ai, ina ia silasila ma faatonutonu lelei le faiga o atinae, atonu o le a silasila totoa i ai, aua o le mea lea e tupu nei, na ona o lava o le Komiti Faafoe o lea Faalapotopotoga ma lea Faalapotopotoga, fai a latou atinae, e aunoa ma le silasila i ai, e muamua lava ona aumai i le Kapeneta e pasia ai pe afai ae tele se atinae, a o aiaiga ma silasila i ai i le tele o tupe a le atunuu e alu ai, ae uma ifo, e leai se tupe e maua mai ai, na o tupe gau ma tupe gau e faia pea, ae ou te talitonu, o le Tulafono Tau Faaofi lea o le a silasila i ai ma mautinoa ai e le Matagaluega o Tupe o atinae e faia ma faatinoina, e manuia ai le atunuu, ae le o le gau ai pea o le atunuu. Peae lava lau Afioga i le Fofoga Fetalai, i le taua o le Tulafono Tau Faaofi lenei, ae le o le gau ae saga alu ai lava tupe e fai ai, ae atonu o le Tulafono Tau Faaofi la lea o le a silasila totoa i ai le Matagaluega o Tupe aua o latou, e aumaia lipoti i totonu o le Kapeneta e silasila i ai i le taua o lea atinae ma lea atinae. E le faapea e matou te fai atu e leaga atinae, leai, matou te lagolago i le atinae e manuia ai le atunuu, aemaise ina ia puipuia ai a tatou tupe e utiuti o tupe o lo o maua mai ai fesoasoani mai fafo, ae leai ma se return o maua ai a lo tatou Malo.

Ia pau lea o le mea ua ou tulai atu ai lau Afioga i le Fofoga Fetalai i lenei Tulafono Tau Faaofi, talosia ina ia faataoto lelei ai tulaga ia mo le fuafua lelei, fuafua tatau, e le gata i a tatou aitalafu, a o tatou atinae o lo o faagasolo o lo o tele tupe o lo o alu ai. Ma lou faaloalo lava.

FOFOGA FETALAI: Malo faafetai tuualalo. Ia o le a avatu le avanoa mulimuli mo le sui usufono mo Aana Alofi Nu. 3, o lea ua faailoa mai e le fomai o le tamaoaiga e le fia saunoa ua malie ia i le Tulafono Tau Faaofi.

Tulai mai le sui usufono mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai mo le avanoa. E lua lava nai vaega faamolemole lau Afioga i le Fofoga Fetalai e avatu ai se

fautuaga, aemaise lava mo le Komiti o le a iloiloina lenei vaega o le Tulafono Tau Faaofi.

Muamua lau Afioga i le Fofoga Fetalai, o le Vaega 78A i le (f); e talitonu lau Afioga i le Fofoga Fetalai, e le o maua i le faaupuga o lo o i ai i totonu i i le agaga o lo o manaomia ai le authority a le Minisita, ona e talitonu o le faaupuga o lo o i ai nei o le mea lava lea o lo o i ai nei. A i ai ni aafiaga faalenatura o lea e plan ahead, ae le o faasaua i totonu o le Tulafono Tau Faaofi le agaga, atonu o le avanoa lea e mafai ai e le Minisita o Tupe po o le foi o le a vaaia lea vaega ona faaleleia ia i ai ni faatupega faaopoopo mo le faaleleiga o aafiaga mai mala faalenatura, ona e talitonu o le faaupuga o lo o i ai nei o galuega o lo o faatino pea i le taimi nei, ae le o i ai i totonu o le Tulafono Tau Faaofi se vaega e ave ai le authority mo le taimi o natural disaster ina ia mafai ona i ai faaunegatupe faaopoopo.

O le vaega lona lua lau Afioga i le Fofoga Fetalai, o le vaega lea o le quarterly summaries. Faafetai lau Afioga i le avanoa lea ua mafai ai ona provide e le Ofisa o le Tupe quarterly summaries i tausaga taitasi. Peitai ane lau Afioga o le tuualalo, ona o lea ua taua mai e ao ona faatinoina i kuata taitasi o le tausaga ona ave lea i le Ofisa o le Audit ona faasalalauina lea i totonu o nusipepa. O le lagona lau Afioga, atonu o se avanoa taua foi lea e tatau ona tuu ai i totonu e faaoo mai i totonu o le Palemene. E i ai se lagona afai ua faasalalau lautele, e ao ona i ai foi se malamalamaaga o le Palemene, e tapena ai foi e le gata i le Komiti o Tupe, a o le tatou Palemene i le oo mai o le Budget i le isi tausaga a ua i ai se malamalamaaga i Lipoti nei i tausaga taitasi. Faafetai.

FOFOGA FETALAI: Malo. Tulai mai lau Afioga i le Palemia, ona tuu atu ai lea o le tatou Fesili e faaauau ai le tatou Tulafono Tau Faaofi.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le a ou amata atu i Falealupo. O upu tomua a Falealupo, le sui usufono mo Falealupo, o lo o aumaia ai ma faataua le upu fuafua, fuafua tatau lea o lo o tuliloa mai lau faamalamalamaaga o le agaga tonu o le Tulafono Tau Faaofi. Ona sau ai loa lea o lana saunoaga e faapea, i tua atu o le fuafua tatau e leai se tuaoi, leai se tapulaa. O i ina tonu lava ua atagia ai le sese atoatoa o le lauga a Falealupo, o le leai o se tapulaa. A leai se tapulaa o lea e i ai tapulaa. O mea nei o fuafuaga o le tatou tamaoaiga e pei ona ou avatua ananafi, e faataoto fuafuaga, ona tatou faagasolo loa lea e faatino, ae faatino i le Tala o le Tupe. Ia, e i ai taimi e alu alu ai se vaega o fuafuaga ua fai e le faatinoa, ae i ai foi taimi e alu alu ai ua ova le faatino. O le uiga lena o le soifuaga lea tatou te i ai. O fuafuaga foi tatou te faia, e le faia tutunoa ni fuafuaga, e fai fuafua i mea na tutupu i le la tausaga. O lona uiga la e leai ni mea e faia tutunoa. Se i vagana le tagata e le i galue i totonu o le Ofisa o le Tupe ma faufau mai ai le Tala o le Tupe ona le malamalama lea i mea ia. E le i faia tutunoa ni fuafuaga e aumai i totonu o le Maota lenei. Ia manatua foi, e i ai le upu faapea a i latou o lo o i ai le tomai faa-historic, i latou e faamaumauina tala o mea e tutupu i lo tatou olaga, tala faasolopito.

O le manatu autu e faapea; a e fia malamalama i mea e tutupu i le lumanai, vaai i mea na tutupu i le tuanai, aua o mea na tutupu i aso ua pasi, o i ina e faatonutonu mai ai le lumanai. Aisea? Aua foi e i ai le tofamamao, o le mea e

tupu e toe tupu foi. O lona uiga, afai ua i ai ni lesona lelei ua tatou experience ina ma tatou iloa, o lesona lelei na e tatau ona tatou mulimulitai ai. Ae afai foi o i ai ni lesona faaletonu, o lesona na e tatau ona tatou faia le fuafuaga e aua ne i toe tupu mai. E faapena la mea o fuafuaga mamao a le tatou Malo e faataoto, e i ai lava e ua togia i ia foi matafai, o le forecast ae faavae i le toe mataitu lelei o galuega sa faatino i lea tausaga ma tausaga ua mavae atu, mataitu po o a mea sa faaletonu. O mea la na a le foia, e ono toe faaletonu ai foi fuafuaga mo le tausaga fou. E le o ni mea tutunoa la mea e aumai i totonu o le Maota lenei, o mea ua fuafua lelei. Ae pei ona ou fai atu, o le lalolagi lenei tatou te i ai, o le lalolagi matua saosaoa le mea lea e i ai le lalolagi lenei. O le isi mea e saosaoa ai, ua alu i luga le tau o mea, fesuisuia i le exchange rate, fesuiaiga o tupe. O le fesuiaiga o tupe, e oso ai i luga ma le tau o oloa ona le feauautai ai lea o fuafuaga sa faataoto. Ae oo foi i le suiga o tupe, e take into consideration mea uma ia, e fuafua uma lava le tulaga e ono oso ai i luga le inflation i le tausaga fou. A foi lea e aumai lava i le lauga a le Minisita o Tupe, e folasia atu ai i le amataga fuafuaga mamao i mea e tutupu i Amerika ma atunuu i fafo. Aua foi o mea e tutupu i fafo, e oo mai ona galugaluga i Samoa nei. O le ala lenei e taua ai tele, a oo ina tapena le lauga a le Minisita o Tupe mo le faasilasila atu i le atunuu atoa, e amata mai i le vaauga lautele i mea e tutupu i fafo, le economy, i le fesiisiitai o le tau, fesiisiitai o le tulaga o le tupe maua GDP a atunuu, ma le fesiisiitai o le tau o le soifuaga i atunuu mamao. O i ina la e fau ai mafaufauga ia e aumai i totonu o le Tala o le Tupe lea. E le o ni mea la e tutunoa, ae i ai lava mea e tutupu e le mafai ona taofiofia, aemaise pe a malosi le osofaiga o le taua i le Middle East, Arapi Tutotonu. O lea ua oso mai le Ebola, e aafia uma ai lava le lalolagi, e aafia ai le fesuiaiga o tupe a atunuu, e aafia ai le lalolagi atoa. I le taimi lenei, a oo ina talanoa i le maketi o le lalolagi, e tasi lava le maketi. So o se mea tele lava e aafia ai se atunuu mamao, e oo mai lava iinei ona galugaluga, leaga e aafia uma ai lava atunuu o le lalolagi.

Lau Afioga i le Fofoga Fetalai, o mea na e le mafai ona tatou pulea. A o le upu lea o le leai o ni tuaoi, e leai ni tapulaa, o lea e i ai tatou tapulaa. O a tapulaa ia? A lea e faatonutonu mai e le Tulafono aupito maualuga a Samoa o le Faavae. O le a le tapulaa lenei e tau mai i ina? O le 3%. O i ina foi lea e tali ai le manatu lea sa aumai e le isi sui usufono pe a oo i taimi o faalavelave faafuasei, ona tago lea i le 3%. O le ala lenei na ala ai ona faataoto mai e le Faavae. Sa na o le 1% sa i ai, ona aumai foi lea i le Kapeneta lenei le Teuteuga o le Faavae, ua le lava le pasene e tasi, ua le iloa po ua ono ea po ua valu tausaga talu ona aumai le teuteuga lenei o le Faavae. Ua le lava le 1%, ua oo tatou i le maualuga o tau e toe faaleleia ai le tamaoia pe a oo ina oso mai afa. O lea la ua 3% ai e mafai ai ona aapa i ai le Kapeneta e aunoa ma se tau apaapa mai i se faatagaga a le Palemene. O lea la ua taoto mai le 3% lenei e gaoioi ai le Kapeneta e aunoa ma le toe apaapa i se isi pule. O lea ua aumai le pule mai totonu o le Faavae e mafai ai ona faaalu e le Malo se vaegatupe e le i pasia atu i le Palemene lenei, ae faataga mai e le Faavae e mafai ona oo i ai le malosi o le Malo, ae faamuta i le 3%. Se i vagana foi la ua silasila atu Afioga i le Kapeneta, le Sui Palemia ma Minisita o le Kapeneta e le talafeagai e toe moomia nisi tupe ona valaau loa lea o le tatou Fono. O lea foi la ua i ai le uta fetalai, ia manatua foi o le uta a le poto e fetalai. O le uta fetalai lenei lea na toe teuteu ai le tatou Tulafono Tumau. O aso la, sa na o le tasi lava le Fono, a sau lava le Malo e manao e tasi le Fono, e tasi lava le Fono, na o le

Fono e talanoa ai le Tala Autu o le Tupe, ona sau sau lea ua lua Fono. A o le agaga lena i le tele lava o e fai mafaufau, ua lava le tasi o le Fono a le Palemene. Ia sa na o le tasi lava la le Fono sa masani ai, ona sau sau ai lea lua Fono, o le Fono o le Tala Autu o le Tupe ma le Tala Faaopoopo o le Tupe. O le a la le mea lea ua i ai nei? Ou te iloa po ua fitu ea Fono. O lona uiga, e leai lava se mea e toe popole ai, o lea lava ua faataoto tatou Fono e mafai ona Fono ai pea, o lea ua tatou Fono i lenei foi masina, e le o toe mamao foi Novema, Tesema toe Fono foi, uma Tesema toe fono foi ia Ianuari e faamaea le Tala Faaopoopo o le Tupe. O lea la e i ai le tulaga i tuaoi po o tapulaa, o i ina tonu lava lea na ou fai atu ai i le amataga, e sese atoa ai lava i ina le lauga a Falealupo, faaletonu atu ai ma lauga a isi sui usufono ia na mulimuli mai.

Afioga Hon Aeau Peniamina Leavaiseeta: Lau Afioga i le Fofoga Fetalai...

FOFOGA FETALAI: Faatoa maua lou avanoa pe a uma atu le folasaga...

Afioga Hon Aeau Peniamina Leavaiseeta: O lona uiga la... Ia lelei, lelei.

FOFOGA FETALAI: Oi ia, tulai maia le sui usufono mo Falealupo.

Afioga Hon Aeau Peniamina Leavaiseeta: Lau Afioga, o le Tulafono Tau Faaofi lea tatou te talanoaina nei, le Finance Management Bill, e faasino lea i coordinating activities o le Government Sectors i latou development projects, atinae, ok. Ia mo se faataitaiga la; o le uiga tonu lena masalo ne i te i ua ta le fetai i le corner lea. O le mea lea e fai atu, na o se faataitaiga, o le fale foi lea i le malae tapolo, mo se faataitaiga, that is a project. Ona fai loa lea o fuafuaga, fuafua le tupe e ave i ai, ae uma ane, e \$1.5milionia le ova. Manatua a 15 developments faapea ae 15 - ua e maua mai le... peiseai o le agaga lena na mafua ai. O le a le mafuaaga o nai mea faaletonu ia e i totonu i i? O le mea la lena na ou fai atu ai, pei o le agaga lena.

FOFOGA FETALAI: Ia, o lea ua maua le faatusa a le sui usufono, o lea ua i ai. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: O le isi tulaga faaletonu tele o lau example lea na aumai, e leai ni tupe o ave i le malae tapolo. O le tulaga la lena i le mea lea o le leai o se tapulaa, o lea lava ou te iloa fuafuaga ua le feauautai. O lea lava e i ai le avanoa e mafai ai ona tatou faia nogatupe e mama tului, ma o le faavae lava lea na sau ai Samoa i le amataga, o le tatou tapa tatou te le o i le maketi e aumai ai nogatupe taugata la e sese ai le tele o atunuu ma tele ina mafatia ai o le o i le maketi. O lona uiga o le o i faletupe e sau i luga tului po o le 20%, a o tatou tatou te le o i ai i na mea, tatou te o i faletupe e mama tului. O le ala foi lena e ala ai ona amanaia tele ma aloaia lea tulaga tau tupe o faiga faavae a le tatou Malo. Ma e pei ona agai foi i ai se manatu i faiga faavae ia i mea tau aitalafu. O faiga faavae lava ia o mea tau aitalafu, o faiga faavae lautele e faatafagaloa mo atunuu uma. A o le mea lava ia e faataua, o le malosi e service ai nogatupe, capacity to service, ia loads. O lona uiga o le malosi e totogi ai aitalafu. A lea sa ou faasilasilaina atu foi le mau milionia ma

miliona na aumai fai ai le tatou malae vaalele. A o lea foi na ou tau atua na o le \$400 le mea e totogi i le tausaga. O lea sa ou tutu atu i i ma faasilasila atu le itulau lea e avatu, ina ia outou malamalama ai i le uiga moni o le mea lea e talai atu e le Malo. E tatou te o i le auala e mauagofie ai a tatou nogatupe ona o le tulaga foi lea e togitogi e mama le tului. Ae le soona avea foi i faalapotopotoga na, e le soona avea i ni atunuu e faatamala a latou fuafuaga tau tupe. E tilotilo lelei lava i le malosi. O le malosi lea e i ai tatou i le taimi lenei i le totogi aitalafu, na o le 5% e fua lea i le tulaga o a tatou foreign exchange earnings. O tupe ia tatou te maua i le tausaga mo le toe okaina mai o oloa ma totogi ai aitalafu, tupe a isi atunuu. E fua la i lena, ae o lea sa ou i ai nei i le faletupe o le lalolagi na ou tapa ai ma ou vaai i ai i a latou faamaumauga, o le tulaga lena. E 5%. O le a le uiga o lea mea? O \$1 taitasi lava tatou te maua mai fafo, na o le 5% lava e alu i le totogiina o a tatou aitalafu, a o le isi 95% o le mea lena e tafili saunoa ai tatou.

Lau Afioga i le Fofoga Fetalai, o le mea lena aua e te popole vale ai fua oe Palu, e leai se mea e te soona popole ai fua. O le upu lea faapea leaga ua i ai mea tutupu, e sao lelei le upu lea, e sao lelei le upu lea, i la outou fautua mai, leaga ua i ai mea ua tutupu. O lena e sao lelei lava le upu lena. E sao le upu lena i le tulaga lena, o le ala tonu lava lena na ala ai ona tumalo le HRPP, ma toe aumai pea e le atunuu i le valu faiga palota i le 32 tausaga lea ua i ai nei o tutu i i. Ma sa ou i ai i totonu i le taimi lena i le tau faataotoina o a tatou fuafuaga mamao, o lea la e alu ai lava. Sa tatou i ai foi ma lau Afioga i le Sui Taitai ma le Taitai, sa tatou nutimea faatasi ai lava i i. O lea lava la lua te iloa o lea e lelei lava le faagasologa, ae pei o lena e te lua polokiki mai i le tulaga o le faafefe o tatou. E leai se mea e te lua popole ai, o mea lava ia sa tatou faia a o oulua i i, o lea e sosolo ai lava i luga, e leai se mea lua te popole ai.

Lau Afioga i le Fofoga Fetalai, o le tali atu lena i mataupu na laga mai.

FOFOGA FETALAI: Malo faafetai. E manatu ua malamalama ma manino le folasaga a lau Afioga i le Palemia. Faafetai atu foi i le paia ma le mamalu o lea Itu o le Maota. E taua finagalo lagalaga ma ave le tuualalo lelei ma le tuualalo e maua ai le finagalo saili ma le finagalo mautonu o le tatou Malo aua le faatinoga o lenei Tulafono Tau Faaofi taua aua le faasoasoina o a tatou tupe.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Pulega o Tupe a le Malo 2014 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloiloina ma toe lipoti mai i le Fono Aoao i se isi fonotaga o lumanai.

TULAFONO TAU FAAOFI O LE OFISA AUTU O MATAUPU FAALETULAFONO MO TAGATA LAUTELE 2014 – faitauga faalua

FOFOGA FETALAI: Mo le silafia e le Palemene, o le Tulafono Tau Faaofi lenei sa faia lona faitauga muamua i le Aso Fono 19/8/2014. O lea ou te valaau atu ai i lau Afioga i le Minisita mo Faamasinoga ma Pulega Tau Faamasinoga e tulai mai.

Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai ma le mamalu o le Fono Faitulafono, ou te tulai atu i lenei taeao fou e faatu se lafo, *Ina ia faitauina le Tulafono Tau Faaofi o le Ofisa Autu o Mataupu Faaletulafono mo Tagata Lautele 2014 i lona faitauga faalua ma ou te fia tautala faamalamalama i ai.*

Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai mai lau Afioga i le Tamaitai Minisita.

Afioga Hon FIAME NAOMI MATAAFA: Lau Afioga i le Fofoga Fetalai, o lenei Tulafono Tau Faaofi ua saunia ina ia faavaeina ai se Ofisa Autu o Mataupu Faaletulafono mo Tagata Lautele.

Ma o le agaga o lenei Tulafono Tau Faaofi ina ia fesoasoani e tuuina atu le galuega faa-loia mo tagata e le o gafatia le faatupeina o le totogi o loaia. Ma e pei lava o le tulaga masani i le faavaeina o se Ofisa Autu o lo o loaia i le Tulafono itutino eseese e ao ona tapena i ai, o se e faauluulu i ai lenei Ofisa ma le aufaigaluega ma se Pulega foi e vaaia i le tulaga aoao pe faatonutonu.

O le Pulega mo lenei Ofisa Autu o se Pulega e tolu ni ona sui, e i ai le Ofisa Sili o le Matagaluega o Faamasinoga, o le sui o le Minisita mo Faamasinoga ma le Peresetene o le Sosaiete a Loia o Samoa po o sona sui. Lau Afioga i le Fofoga Fetalai ma le mamalu o le Fono, o lenei auaunaga fou o i ai le faamoemoe e faatulai mai ina ia siitia ai pea le auaunaga o lo o tuuina atu i le atunuu i le manaoga i mataupu faaletulafono po o le access to justice. O se faiga foi lea o lo o faatino i atunuu i fafo, ma o lea ituaiga galuega e faipaaga ai le faigamalo ma le Sosaiete a Loia. Atonu e taua lau Afioga i le Tulafono Tau Faaofi lea mo Loia, sa saunoa foi i ai le Maota i le amataga o le tatou Fono ananafi, e fesoasoani foi lenei Tulafono e poupuu ai le Sosaiete, aemaise lava i le tapenapena mo lona galue faapaaga ma le Malo.

O lenei fuafuaga mo le Ofisa Autu o se fuafuaga faataatia a le Vaega lea o le Lala o Tulafono ma le Amiotonu po o le Law and Justice Sector, i le tali atu lava lea i manaoga o le tatou atunuu i auaunaga faaletulafono ma fesoasoani mo le oo atu o le mamalu o le atunuu i luma o le Faamasinoga. Ma e malie foi i le faalogologo i lenei taeao le saunoaga a le Palemia i fuafuaga, e faapena ai foi lenei fuafuaga faataatia ua leva ona fuafua mai ma o lea ua faagasolo ae taua tele lau Afioga i le Fofoga Fetalai le tapena o le Tulafono Tau Faaofi ina ia oo atu ai i le taimi e mafai ai ona faatino i ona vaega eseese a ua taoto le Tulafono Tau Faaofi e fai lea ma taiala i le faatinoga o le auaunaga.

E pei foi ona silafia e le mamalu o le Fono, o le tele o a tatou fuafuaga ma polokalame o lo o faataatia i lalo o lala eseese o lo o galueaiina i totonu o le Malo po o tatou sectors. O le tele o vaega o na atinae o lo o faatupe mai fesoasoani mai a tatou paaga i fafo, e vaavaalua ma a tatou tupe maua mai lea taimi i lea taimi.

Lau Afioga i le Fofoga Fetalai, o se faamatalaga puupuu lea mo lenei Tulafono Tau Faaofi. Ma le faaloalo.

FOFOGA FETALAI: Malo faafetai saunoa faamalamalama. Ia, o lo o i ai sui usufono o lo o fia saunoa i le taua o lenei Tulafono Tau Faaofi. Tulai mai le sui usufono mo Faasaleleaga Nu.2.

Susuga PAPALII LIO FAAVAIVAIOMANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai mo le avanoa. Faafetai foi i le Afioga i le Tamaitai Minisita mo le faamalamalamaina o lenei Tulafono Tau Faaofi pei ona faafofoga foi i ai le Maota i le mafuaaga o lenei Tulafono Tau Faaofi, ona o se Ofisa fou e faatu aua le fesoasoani i le mamalu o le atunuu. Malo faafetai i lau Afioga i le Minisita faapea foi le Pulega. Atonu o lea foi ua maua le agaga tonu o lenei Tulafono Tau Faaofi, o lea foi ua faafofoga le Maota ma matou faalogologo, atonu o lenei foi avanoa e avatu ai foi se matou sao i lenei Tulafono Tau Faaofi e pei foi ona moomia ai le autu ma le faavae ma le aoga eseese o lenei Tulafono Tau Faaofi aua le faatinoina i le atunuu.

O le vaavaai atu i lenei Tulafono Tau Faaofi, e pei o le aua autu lea ua saunoa i ai lau Afioga i le Tamaitai Minisita, e pei o le fesoasoani mo le atunuu, aemaise lava e ua le gafatia le vaaia o loia aua le faatinoina o Tulafono. Ae i le taimi foi na tatou talanoa ai i le tatou semina ma sa tatou faalogologo ai foi, e i ai foi le isi mafuaaga ua mafua ai ona faatu lenei Tulafono Tau Faaofi, ona o aiatatau, e pei foi ona maua mai i le saunoaga a lau Afioga ma e ua molia. E pei o le tasi lena fesoasoani tele o le Tulafono Tau Faaofi i o tatou tagata. O lea foi ua maua se fautuaga mai le tatou Faalapotopotoga foi lea o le Law and Justice Sector mo le manuia, aemaise lava le agai i luma o tatou tagata ma le feagai ai ma Tulafono. Malo faafetai, faafetai foi i lea Faalapotopotoga mo le latou foi fesoasoani, tele lo latou sao i le atiaaina o le Law and Justice Sector i le tele o Matagaluega lea e i totonu o lea matata, ua tele lava atinae fou lea ua tulai mai ona o fautuaga. Ae le mafai foi ona tuua a matou fautuaga, e ao ona avatu i mafuaaga ma aoga o lenei Tulafono Tau Faaofi ua tulai mai.

O le fesili lava e tulai mai i lou mafaufau, pe tatou te le o faia i le taimi lenei lenei fesoasoani ma lenei foi avanoa mo le mamalu o le atunuu. Ou te talitonu lava, se i ou agai muamua lava i mea nei o aiatatau, masalo o lo o silafia foi e le Ofisa o le Loia Sili faapea foi le Matagaluega o Leoleo, tasi lea matafaioi ua matua malamalama i ai le Matagaluega o Leoleo i le taimi lenei, o mea ia o aiatatau. Ua uma foi ona talia i luma o le Faamasinoga le caution card lena, o le caution card lena o la e i ai i totonu aiatatau nei, ua taua foi o se meatotino a so o se leoleo. O lea e afio mai le Afioga i le Minisita ma le Matagaluega. O le taimi lenei, so o se leoleo lava o faigaluega ma faatino ona tiute, o lo o i ai lava le caution card i lana taga, o le taimi lava e faafeagai ai ma e ua manaomia mea ia o aiatatau, o le taimi lea e faatino ai loa e leoleo. Ma o le taimi lenei, pei o se mea fiafia foi a le Matagaluega ia ma i latou foi e masani ona oo i ia tulaga ua malamalama lelei, aua o le taimi lava e faafesagai ai, e tuu loa i ai e le leoleo ia le caution card lea, o i ina tonu lava o lea e faamalamalama uma ai aia tatau nei. O le uiga o lau faamatalaga ua tele lava le aoga pe afai o le isi lea faavae o le Tulafono Tau Faaofi lenei, ae ne i meaane faapea ai tatou te le o faia, e leai o lea lava tatou te faia i le taimi lenei ua tele foi le fesoasoani i le fesootaiga a le Matagaluega o Leoleo ia ma ofisa o loia taitasi i mea lava ia i mea lava nei tau faatinoina o aia tatau a e o

lo o aafia i mea nei o soligatulafono. E pei o le agaga lena ma le manatu o lou sui usufono, pe o faatino pe leai, a o le taimi nei, o lea lava tatou te faatinoina i le taimi lenei ma o lo o silafia foi e le Loia Sili ma le Ofisa o le Loia Sili ma le Matagaluega o Leoleo o lo o manino faatino ia tulaga uma i le taimi lenei pe a faapea, e tasi lena vaega o le Tulafono Tau Faaofi lenei.

O le isi itu lau Afioga i le Fofoga Fetalai, aua e talitonu lava o le tasi lea anavatau foi o tatou o le lagolago o le Private Sector. Ou te talitonu foi o le tasi lea fesoasoani o ofisa loia foi o le private sector, e fesoasoani foi i le atunuu. Ia manatua foi o totonu lava o le Tulafono Tau Faaofi, o lea foi e i ai fees e charge i le mamalu o le atunuu. O lona uiga, e tai leai lava se eseese tele pe a faapea o le tulaga lena, aua o lea foi e tatala mai ia fees e charge i le mamalu o le atunuu, a o tulaga faapena, o lea e i ai foi ia ia foi pisinisi e fesoasoani foi ma lagolago i le atunuu, aemaise foi leaga o lea e totogi foi a latou lafoga e oo lava i a latou VAGST, e oo foi i latou laisene, e totogi uma lava. O le tasi lea sao o ia foi pisinisi private sector i le Malo ma le atunuu. Pei o le tasi lena agaga o lou nei foi sui usufono, leai e faailoa atu pea le tulaga o lo o i ai, ina ne i faapea ane, ua tatou silasila i se isi itu ae tuu le isi itu, a o itu na, leai ona o le tasi lea matafaioi foi a lo tatou Malo ma tatou foi o Taitai, ia fesoasoani foi i private sector latou ia i le agai i luma aua le tautuaina o le atunuu, aemaise foi o le fesoasoani mai i le Malo i a tatou tupe maua.

O le isi itu lau Afioga i le Fofoga Fetalai, o lo o i ai le Komiti lea pei ona saunoa le Afioga i le Tamaitai Minisita o le pulega aoao, ia tasi foi lea Komiti ou te iloa e gafatia na o le Pule Sili, a o lea foi o le a i ai ma se sui o le Minisita, e i ai foi ma le isi vaega lea, e talitonu foi e alu ai foi a tatou seleni, o a tatou tupe faaalu lava lea e vaavaai i ai. Ae e vaavaai i le taua ma le aoga o ia foi Komiti, a o le vaavaai i ai, afai lava o le a se tulaga pe a faapea e taunuu, ia ou te iloa e lava tele lava i le Pule Sili i lana ia silasila aua le faatonutonuina o lenei foi Matagaluega fou pe a taunuu.

O le isi mea lau Afioga i le Fofoga Fetalai, o lea ou te vaavaai atu i lea Faauluuluga o lenei ofisa autu pe afai ae taunuu o lona tau o le Tagata Faufautua a le Malo, ne i te i ua afaina ai tiute o le Loia Sili leaga o totonu o le Faavae lea e i ai tiute o le Loia Sili, na o le Loia Sili lava e fautuaina le Malo. Ne i te i foi ua fai atu lea Faauluuluga toalua ma le Loia Sili e faufautua faatasi i le Malo, leaga o lea e sau i i, o le Faauluuluga lena o lea foi ofisa fou o le a faatino, ona o lona tau lea e tau mai ai i i, o ia o le Faufautua a le Malo, ae ina ne i te i ua tau fao ma le Loia Sili le fautuaina o le Malo ona o le Tulafono Tau Faaofi fou lea ma lona Faauluuluga. Ma le faaloalo lava i lau Afioga i le Fofoga Fetalai, faafetai.

FOFOGA FETALAI: Malo faafetai saunoa. O le a avatu le avanoa i le sui usufono mo Faleata Sasae, ou te masalo pau ia o sui usufono e fia saunoa. Oi ia, faailoa mai leaga o lea e alu lo tatou taimi.

Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, e muamua ona momoli lau faafetai i le Afioga i le Minisita mo lenei Tulafono. O lenei Tulafono Tau Faaofi lenei ou te faaigoaina o se Tulafono Fesoasoani, o le Tulafono lenei o Tulafono e fia faafofoga i ai le atunuu, aua foi o le tele o lenei Tulafono e oo foi i

galuega uma o lo o faatino, o le fesoasoani, assistant. O lea la ou te momoli ai le faafetai tele o lea ua i ai foi lenei Tulafono Tau Faaofi e fesoasoani, e ui lava e fesoasoani i tagata ua soli le tulafono, a o lea ua i ai le avanoa e mafai ai ona fai le mea moni e mafai ai ona maua se avanoa o le tagata e le lava le faasoa e mafai ai ona finau i totonu o le Faamasinoga.

E i ai la vaega o le Tulafono Tau Faaofi e le oo i ai le fesoasoani lea, lea e sau i i i le vaega 6 o le Tulafono Tau Faaofi. Ia e i ai foi vaega ia pei o le faataitaiga; o le vaega lea o le vaega tama, o vaega ia o Fanua ma Suafa, o vaega nei o Fanua ma Suafa, tasi lea vaega e tele ina alu ai ia le taimi o le atunuu aemaise lava i le Faamasinoga o vaega nei, ae o lea la e le o lavea ai i i aemaise lava i apili o iuga o faamasinoga le vaega lena. Pe le mafai ona tagai ane ia lau Afioga i le Minisita ma le Matagaluega i se isi vaega e mafai ai ona fesoasoani i vaega lea ua oo loa ina tataua ona manaomia ni loia e finauina ia vaega nei e tau o Fanua ma Suafa.

O le isi vaega lau Afioga i le Minisita, o lea foi e sau i i i le vaega lea, e le aafia ai le fesoasoani lea e ave i le Ministry le fesoasoani lea e tau o le Ministry Aid, lea e sau i le vaega 6 lea o le Tulafono Tau Faaofi. Ou te fia fesili, o le a le fesoasoani lea a le Ministry Aid? Afai loa o lea ua i ai le Tulafono Tau Faaofi lea e mafai ai ona faaoga vaegatupe ia e fesoasoani ai i tagata faapea, o le a la le mea e le tuu ai loa le fesoasoani lea a le Ministry, ae aumai loa le vaega lena i lalo o le Tulafono lenei e faatino ai le vaega lea, ina ia...aia o lea o le a lua ai foi vaega faapenei, ia ona maua ai lea o le feeseeseai i totonu o le Matagaluega? Aua o le Matagaluega lava lea a le Ministry, lea latou te faatinoina le Tulafono lenei, a o lea foi e sau i lalo o le Tulafono, e le aafia ai le Ministry Aid. O lea la na ou fesili ai i lau Afioga i le Minisita ou te fautua foi, o le a la le mea e le tuu ifo ai loa le Ministry Aid i lalo o le vaega lea, ina ia aua ai ne i tele ni tupe e alu, aua e tasi lava lo latou faamoemoe o le fesoasoani i tagata e le lava le faasoa.

Ia ma le isi au fautuaga mulimuli i lau Afioga i le Minisita, o lea foi e i ai le vaega i i e tuu atu ai se totogi i le tagata o lo o manaomia le fesoasoani lenei, ae o lea foi e sau i le isi itu, e mafai ona ave fua le vaega. Se i tagai ane po o a ituaiga vaega e ave i ai le totogi e totogi mai ai pe a manaomia le fesoasoani lea, a o a foi vaega e maua fua mai ai le fesoasoani?

O nai manatu ia lau Afioga i le Fofoga Fetalai aua le faafofogaaga foi a le Afioga i le Minisita. Ma le faaloalo lava.

FOFOGA FETALAI: Malo faafetai. Ia se tasi o sui usufono mo Salega, Afioga Afualo Wood Uti Salele, ona sosoo ai lea ma le sui usufono mo Faleata Sisifo.

Afioga AFUALO WOOD UTI SALELE (Salega): Faafetai i lau Afioga i le Fofoga Fetalai mo le avanoa.

E momoli atu foi le faafetai i le Afioga i le Minisita mo Faamasinoga ma Pulega tau Faamasinoga ona o le taua o lenei Tulafono Tau Faaofi, atonu o lea ua faafofoga le atunuu aemaise foi o le Maota nei, o le agaga atoa lava ia o le Tulafono Tau Faaofi, ina ia tapena se fesoasoani mo e ua soli le tulafono ia pe soli i le agaga sa fuafua po o ua soli ona ua paivalea ae le gafatia e le tamaoaiga ona tali atu i iuga o le Faamasinoga, ia o lea la ua tapena ai le fesoasoani. Ua leva lava ona ou nofo ma ou tilotilo i ai i le Tulafono Tau

Faaofi, e i ai ia vaega lau Afioga i le Minisita ou te fia fesoasoani atu ai i lau Afioga.

Muamua, e tatau lava ona tausia ia le feagaiga lea ua uma ona faataoto e le Malo le faiga paaga lea ma Faalapotopotoga ma Pisinisi Tumaoti, e taua tele ia te au le feagaiga lea, ona o i e faasoa atu ai e le Malo le tele o isi auunaga lea e faatino i lalo o Matagaluega ma totino tumaoti a le Malo, ina ia faatino e Faalapotopotoga ma Pisinisi Tumaoti. I le vaavaai la i ai, o lea ua vaai ua soli e le Tulafono lea le feagaiga lea, ona o lea e foliga mai e faaaua mai le Tulafono o se fesoasoani, a o le fesili, pe ausia le mea silisili lea i totonu mo le fesoasoani ona mo i latou e le gafatia? Aua o le upu moni lava, o lea e i ai le vaegatupe lea i totonu e mafai ona faaaua mai lalo o le Tala Faatatau o le Tupe, ona to mai lea o le fesoasoani lea i se isi auala e faamatu i tua o lea e i ai ia alii ma tamaitai loa ia po o nisi foi o le mamalu o tamalii ma failauga a le atunuu, o lea e nafa ma le fesoasoani lea, nai lo le toe tapena o se isi totino, aua o le upu moni lava, e pei e faagaga mai o le fesoasoani ae e maua ai tupe e saili ai tupe. O lona uiga a alu ai alu ai, ia ona siisii lava lea i luga o tupe foi ia e ao mai i lafoga aemaise lava vaega ia e tatau ona totogi e i latou, ia ona ave lea o se tasi o vaega o le Matagaluega e sue ai ana tupe. Ae le o le agaga lena e tatau ona i ai, aua o le agai lava i luga. Ae pe sili ona toe silasila lau Afioga i le Minisita, aua o le upu moni lava, i lau lava vaavaai i ai, a faapea o lea ua taumafai e tali le manaoga o le tagata ua vaivai i lona tamaoiga, pe le ono pisia ai la le faatinoina o le auunaga lea e i latou ia o le a faatinoina e ala i lalo o le Matagaluega, o lona uiga, ia mautinoa ua maua le mea silisili aua e moni lava e taugata ia tamaitai ma alii loa ia latou te faatinoina, ae ou te talitonu e galue i le mea e gata ai lo latou malosi e finauaiina ai ina ia ola le tagata lea ua sala, ae e mafai ona fesoasoani ai ia le Matagaluega, aua afai nei ae faamatu mai i lalo o lona totino lea o le a tapena, ia o tatou o tagata ola e le o tatou o ni agelu. Atonu o lea e i ai ia le Faalapotopotoga Lina Chang e mafai ona fesoasoani mai i ai ina ia mautinoa ua faatino ma tali mai ia le auunaga lea o le a tapena i lalo i i i le mea lea tatou te mananao i ai, ae le maua ai le ute atoa o le galuega. Ae pei o le agaga lava ia pei ona ou fai atu, ona ou te lagolagoina tele le mau a le Malo i le fesootaiga lea e tuu i tua i le pulega aemaise lava ia i latou o pisinisi tumaoti, o lea foi faatoa uma ona tatou talanoa i le pili a loaia, e tele tele le aoga o le Tulafono Tau Faaofi lea ina ia limataitaiina ai foi i latou se i seu silasila i i e tali la i le manaoga lea o tagata vaivai i le tulaga lea. A o le agaga atoa lava ia, ina ia tapena, e le i faigofie le tapenaga o le Tulafono Tau Faaofi. Ae pei o le tuualalo lena e toe seu silasila i ai, ina ia mautinoa lelei, aua ne i pisipisia le auunaga lea ae uma ifo ai, ona tigaina lava lea ma mafatia le tagata vaivai, ae le maua le faamanuiaga tonu lea e manao ai tatou. Faafetai i lau Afioga.

FOFOGA FETALAI: Malo faafetai saunoa. Se i tuu atu le avanoa i le Afioga i le Palemia, tulai mai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sa pisapisao ananafi le Maota nei i le taugata o pili a loaia ma se faiga e fai ai. O le isi lea faiga maoae ua fai e le tatou Malo pei ona tulai atu ai le Minisita Tamaitai o lo o fitoitonu i ai le Tulafono Tau Faaofi Fesoasoani a lo tatou Malo i le faatuina lea o le Ofisa Autu lea e mafai ai ona avatu le auunaga lena mo latou e le gafatia ona

totogi ia ni Loia, o le faigofie ia o le mataupu. E pau lava le mea lea ia manino, a oo loa la i le Faamasinoga e aafia ai le Malo, o se su e faasaga agai i le Malo, ia o la e aveese ai e le mafai ona avea i ai le fesoasoani lea, aua e le mafai ona fesoasoani le Malo e toe su le Malo. E le mafai la po o ai lava le Matagaluega po o le Faalapotopotoga, a o le tele lava o mea nei o le va o le tagata i le tagata, po o le va i le tulaga o le solitulafono, o lea la ua avatu ai sina fesoasoani lea a lo tatou Malo e faapitoa lava mo latou o lea e tagi mai e le gafatia se tau o se loia, o lea sa tatou talanoa ai i le aso ananafi, ne i te i ua misi atoa le mea lenei ona o lea ua tatou talanoa i ituaiga gagana foi lele e faigofie ona le malamalama ai le taua tele o le Tulafono Tau Faaofi lenei ma le itutino lea ua ofo atu e le Malo e fesoasoani atu ai ia i latou, e le mafai ona totogi se loia.

FOFOGA FETALAI: Ia tulai mai le sui usufono mo Faleata Sisifo.

Tofa LEALAILLEPULE RIMONI AIAFI (Faleata Sisifo): Faafetai lava i lau Afioga i le Fofoga Fetalai mo le avanoa, faafetai foi i lau Afioga i le Tamaitai Minisita mo lenei Tulafono Tau Faaofi.

A matau i ai lenei sui usufono, o le tasi lenei Matagaluega po o le Sector ua tele suiga mai le tausaga ua mavae, ua tele foi lala fou ua faatuina ina ia fesoasoani i le faatinoina o galuega aemaise o soligatulafono ma vaega faapea, ae e le gata foi i lea, ua tele Tulafono ua tuuina mai e le Matagaluega ma le Afioga i le Minisita. Na faatoa uma atu nei foi le Mediator lea na tatou pasia, o le Tulafono o Family Court, o le Tulafono e puipuia ai aiga ma le lotoifale. Ua faatuina foi le Law and Justice Sector. Ua i ai le Law Commission. Ua uma foi ona pasia le faatumaotiina o le Falepuipui ma le Matagaluega a Leoleo. O vaega ia o lea e faasolo mai. O tulaga lelei ma e tuusao atu foi i ai le lagolago a lenei sui usufono. A o le Tulafono Tau Faaofi ua tuuina mai nei, e fai lava sina augata o lou nei tagata e lagolago ona o nisi o mafuaaga.

Muamua, na faapea mai le Tulafono mai i le amataga, o lenei vaega o le a faatuina ae uluai faatupeina mai i se fesoasoani a Ausetalia po o le AUSAID funding. Po o le uiga o lea vaega o se lala sa fautuaina mai i lalo o se fautuaga mai le AUSAID a Ausetalia, po o se lala ua finagalo lava e faatu ae aumai se vaegatupe e ese mai e faatupe ai? Aua o lau matau, e fiafia tele Ausetalia i le mea lea, e omai faaoso lea mea, faaoso lea mea, ae uma ane le lua i le tolu tausaga ua leai se tupe, ona toe fai mai lea e faaauau e le Malo. A o i ai la se faamaoniga o i ai se commitment mai le Malo o Ausetalia e faatupe le mea lea aua e le taugofie ma e le faigofie?

O lea ua tatou iloa uma lava le aano, o le fia fesoasoani i tagata solitulafono ae ua le lava le tupe. O lea e i ai i totonu o le Matagaluega le mea foi lea e tau o le Legal Aid e fesoasoani ai ia i latou ia e le gafatia loia aemaise lava ia i latou e solitulafono mamafa. E \$200,000 ua matauina e ave i ai e le Malo i tausaga uma i le paketi, a o lea foi la ua toe talosaga mai e faatu lea lala fou. O le fesili la, o le a tonu lava le mea e moomia ai se lala fou? Ua i ai se fautuaga mai le Loia Sili, se fautuaga mai le Ofisa o Tupe ma se fautuaga mai le Matagaluega e Pulea Tagata Faigaluega a le Malo? O lea faatoa uma atu nei le tatou Tulafono lea na saunoa i ai le Afioga i le Palemia, o co-ordination foi ia faatasi ai faapea aua e le tumaoti se mea. Aua e le faamoemoe le isi

Matagaluega i le isi Matagaluega. Ona faatu lea o le Matagaluega ae toe i ai ma le Komiti e oversight ina.

A ou faitau i lalo i tagata faigaluega ia e moomia, e le i lalo o le 10 tagata faigaluega ae ova atu i lenei Matagaluega fou. A o lau matau lau Afioga i le Fofoga Fetalai, e i ai isi lala fou ia na faatu e pei o le Law Commission, o le Justice Sector ma vaega ia, o la foi e tau sailiili i loia ia e lava le experience ma lava le tomai e faatino ai galuega nei. Ua tele a tatou loia, ae e le tele ni loia e i ai ni poto faapitoa ma lava le tomai e faatino ai manaoga nei. O lea la ua fai mai a filifili le Pule po o le Faufautua i le Malo ia le i lalo ifo o le 7 tausaga o galue faaloia. A o lea na tatou talanoaina nei le Tulafono ananafi e 8 tausaga, seiloga e 8 tausaga, seiloga e lava le tomai ona faatoa ave lea i ai o le avanoa.

O le mea lea e tupu e pei e i ai ni vaega e le o consistent i le tusiga ma le manaoga o mea nei ma tulaga faapena. O lea foi e tuu mai le tamaitiiti i le Tulafono Tau Faaofi, o tagata e oo atu i le 18 tausaga. O fea Tulafono e faatulaga ai le tamaitiiti i le 18 tausaga, a o fea le Tulafono e faatulaga ai le tamaitiiti i lalo i isi tulaga e ese mai ai? O lou talitonuga e le o se tamaitiiti le tagata ua 18 tausaga, o lena e silafia i le tele o le mau Tulafono e lau mai, e le o se tamaitiiti.

O lea foi e fuafua mai le mea foi lea o le drug and alcohol po o fualaau faasaina ma ava malos, o se faamasinoga mo ia vaega. Atonu e augofie lou manatu i ituaiga mea ia ona o lea tatou te iloa uma, po o le 90% o soligatulafono e fesootai i vaega na, a o le a se finagalo i ai o le Ofisa o le Loia Sili ma le Matagaluega? Ana fai foi la e faapea o se vaega o le Matagaluega e amata ai, e lelei. Po o se vaega i totonu o le Ofisa o le Loia Sili e pei o mea la e fai i isi atunuu e tau o le Public Defence Office, e i ai ma le Public Prosecution Office. E manaia se mea faapena e amata ai, a o lenei mea o le toe fai o le Matagaluega fou, fai ma le Komiti e vaaia, o lou talitonuga lau Afioga i le Tamaitai Minisita, e le talafeagai mo lenei taimi. Afai o lena e lelei le faatinoina o le Legal Aid pe moomia e toe faaopoopo sina vaegatupe e cover ai ma isi soligatulafono nei, atonu ua lelei. Aua o lona uiga a faatu le vaega fou lea, e \$2miliona i le \$3miliona e faafae ai lenei ofisa i le tausaga. O le a la le mea e le aumai ai se vaegatupe o na mea e faaopoopo i le Legal Aid e cover ai ma faatupe ai le vaega lea e finagalo i ai le Matagaluega, ae aua le toe faatuina se Matagaluega fou? E le o se vaega lena e ao ona vaavaai muamua i ai lau Afioga i le Minisita ma le Matagaluega e faatino i lenei taimi a o le i faia lea Matagaluega fou po o se lala fou? E le talafeagai mo lenei taimi.

O lea foi e pei ona saunoa, o lena ua sau ai ma tau e faaee atu. E leai e le tataua ona i ai ni tau pe afai o le tulaga faapea. A o lau lena fautuaga lau Afioga i le Fofoga Fetalai, toe tagai lau Afioga i le Minisita ma le Matagaluega pe e le toe faaopoopo se tupe e ave i le Legal Aid e faaauau ai fesoasoani i tagata lautele pe afai ua finagalo i ai, ae taatia lea Matagaluega e le talafeagai ma lenei taimi.

Ma le faaaloalo lava.

FOFOGA FETALAI: Le sui usufono mo Aana Alofi Nu.3, a e fia saunoa ona e tulai mai lea ae faaiu mai e le sui usufono mo Gagaemauga Nu.2.

Afioga TOEOLESULUSULU CEDRIC POSE SALESA SCHUSTER:

Faafetai lava i lau Afioga i le Fofoga Fetalai mo le avanoa. O le tele lava o nisi o manatu sa fia faaalua ua avatu e le tele o sui usufono, ae ua na o sina faaopoopoga lau Afioga i le Fofoga Fetalai.

E taua le Tulafono Tau Faaofi ua tuuina mai aemaise o le auaunaga o lo o i ai, a o le lagona foi lea lau Afioga i le Minisita ona e ao ona toe seu silasila le Matagaluega ina ia faaavanoa le tele o seleni ma ia faatele le seleni e ave i le Legal Aid i le taimi lenei, ou te talitonu e mafai ona faapafala atu nei seleni e fesoasoani ai i nisi o vaega. O nisi foi o vaega o lo o sau i le Tulafono lau Afioga i le Fofoga Fetalai, e ao lea i le public awareness aua ou te talitonu o le taua lea aua o le Justice Sector o i latou ia e faalateleina polokalame faale Tulafono. Faafetai i lau Afioga i le Fofoga Fetalai.

FOFOGA FETALAI: Malo faafetai. Levao tulai mai lau Afioga i le sui usufono mamalu.

Tofa LEVAOPOLO TALATONU (Gagaemauga Nu.2): Faafetai tele lava i lau Afioga i le Fofoga Fetalai mo le avanoa. Ua manaia foi a tatou felafolafoaiga i lenei taeao. E puupuu lava se manatu e fia faaalua i lenei Tulafono Tau Faaofi lau Afioga i le Fofoga Fetalai. E le fesiligia le lagolagoina e lou sui usufono o le auga po o le faamoemoe o le Tulafono Tau Faaofi i le fesoasoani lea mo o tatou tagata lautele.

Lau Afioga i le Fofoga Fetalai, ou te nofonofo ma tau fetuunai lou mafaufau ma le fesoasoani lea e faatino e le Komesina o Sulufaiga. A ou tilotilo i le mea fou lea o le a fai nei, o le a latou faia suesuega i mataupu e faasaga i le Malo, o Matagaluega ma Faalapotopotoga a le Malo. I lau la tilotilo i tiute ia, toetiiti lava aiga ma tiute tauave o le Ofisa o le Komesina o Sulufaiga. Ona pau lava se eseese ona o lea o le a mafai nei e le Faalapotopotoga fou lenei ona fai ni moliaga ma ni tulaga faapena, ma ou te lagolagoina ai le finagalo o le sui usufono mo Faleata Sisifo, pe aisea le mea e le amata mai ai faapea aua na ona faatele lava o le Ofisa lea o le Komesina o Sulufaiga e amata mai ai i ina, ona sefe lea o nisi o vaega o seleni ia o le a faatu ai le Faalapotopotoga tele lea.

O le isi itu, o le Matagaluega lena o le mea tonu lava lena e tau o le fesoasoani i le atunuu, ona e leai se fee e totofia. Na ona e savalivali atu lava talosaga mo se fesoasoani i lau mataupu, ona fai fua lava lea ma o le mea tonu lava lena e tau o le fesoasoani.

Ma le agaga faaaloalo, faafetai.

FOFOGA FETALAI: Faaiu maia e lau Tofa Lefau.

Tofa LEFAU HARRY SCHUSTER (Vaimauga Sisifo): Faafetai lava i lau Afioga i le Fofoga Fetalai mo le avanoa. E muamua lava ona momoli atu le faamalo ma le faafetai i le Afioga i le Minisita ona o le Tulafono Tau Faaofi lea, ae faapea foi le Matagaluega o Faamasinoga ma Pulega tau Faamasinoga aemaise o le Loia Sili faapea le Malo.

Ia te au lava ia o le loia, ua ou matua fiafia lava ma ou mimita i le Tulafono Tau Faaofi lea. Aua o lou talitonuga faaloia pe a e vaai i se Tulafono, e te vaai i le atunuu i le agai i luma. O lau vaai i ai e fua pe faapefea se vaavaaiga a se atunuu i ona tagata o la e falepuipui po o i latou o lo o faasala e ui lava

ua latou soli le Tulafono. A faapea e te vaai atu e lelei le faiga o ou tagata pagota, ona e iloa lea o se Malo e alofa le Malo lena.

O lona lua i lau vaai i ai, pe faapefea le taumafai o le Malo ia amanaia aiatatau a ona tagata aemaise lava i latou e le tagolima ma e le lava tupe e faatino ai tulaga ia? O le Tulafono Tau Faaofi la lea e atagia mai ai e faatino ai le itu lea, o le amanaia lea e le Malo o aiatatau a o tatou tagata. O lea la e talitonu o le fesoasoani lea mo i latou e le gafatia ma e le tagolima i le totogiina o se loia. O tulaga na ou te lagolagoina ai tele le Tulafono Tau Faaofi ua faataatia mai nei, ae i ai lava nai atugaluga lau Afioga i le Fofoga Fetalai.

O lau vaai i ai e manaia le faatinoina o le faamoemoe ina ia maua le fesoasoani mo e matitiva, ae tele foi le galuega a le Komiti Faafoe lea o le a faafoeina le vaaiga o le Tulafono Tau Faaofi lea, aua o lea e tau mai i inei ua faatuina mai le Minisita ma le Loia Sili. E le mafai e se Tulafono ona faapea e faataatia uma lava mea i totonu o se Tulafono ona e le faapena le olaga lenei. E i ai lava mea e te mana'o ia i ai i totonu o le Tulafono, ae a tuu i ai i totonu e tele ai foi le vevesi, ae faataatia faalauaitele la.

O le fautuaga muamua aua o le mea lea e tagai i ai le Komiti lea ma le Afioga i le Minisita, ona o lea e aumai i le Tulafono Tau Faaofi lenei, e mafai foi e le vaega lea ona e i ai le totogi o lo o i ai, ia aua ne i tauva le vaega lea ma loia po o private lawyers. Aua o mea uma lava ia e faataatia mai i inei i mea tau Tulafono, e moni lava e i ai le Minisita ma e i ai le oversight committee, a o le tino lava ia lea e aumai i inei o le body corporate, e tutoatasi lava la latou. A finagalo lava la latou e alu lava i o latou mafaufauga ae e le faataatiaina i le atunuu lautele, e mafai la ona tauva ma Ofisa Loia ae e le o le mea lena o lea e faamoemoe i ai le Tulafono Tau Faaofi. O le tasi la lea atugaluga e tataua ona tagai i ai.

O le isi tulaga, e manaia le tulaga lea mo i latou e le gafatia i le civil, ae pau la le tulaga e tagai i ai ona e le o faataatia mai i totonu i inei ae faigata foi. Ae ia tagai le Komiti Faafoe lea pe talafeagai mea ia o le va o ulugalii ua tetea ae le mafai, aua o le tamaloa ia o le tele o taimi e lava le tupe e totogi ai le loia, ae pei o le tina e faalelava le tupe e fai ai se loia. A ia tagai la i le tulaga lea ia talafeagai le fesoasoani i i. Ae tagai la i ai aua o lea e faataga i le Tulafono Tau Faaofi ona fesoasoani i le civil. E le o fai mai la po o a mea e faasa. Ae tagai la i ai ia aua nei i ai le mea lea o le taavale o la e lavea ae fai ai le loia i i ona e faapea o le le tagolima, po o le alu e fai le aitalafu ae sau i i e fai le loia i i. Pe mativa pe a, ae a iloa alu e fai le aitalafu, e te iloa foi totogi lau aitalafu. Ae le faapea la ua le mafai ona totogi lau aitalafu ae sulu mai la i i e faapea e maua ai lau loia i i e finau i le mea lea o le totogi ma le le totogiina o lau aitalafu, pei o se tasi lena o atugaluga.

I le itu i le criminal law, o lo o i ai se vaega o lo o taua mai i i e faapea e ave le fesoasoani i le tagata mativa, ae a faapea o se isi foi lea ua solitulafono soo ma ave i le falepuipui, e mafai ona tilotilo le Komiti e aua le avea i ai le fesoasoani. Lau Afioga i le Minisita, o le manatu mama lava ia, o le aiatatau o le aiatatau. A faapea o le tagata la e solitulafono, o le mea la e i totonu o le Faavae, e i ai le aiatatau so o se isi lava e tuuaia i se moliaga, e i ai lava ona aiatatau e tataua ona faatinoina. I lau la vaai i ai, i si ou manatu vaivai faa-loia, e le tataua ona avea mea faapea o lou falepuipui soo ma mea o le a... A faapea lava e te agavaa e maua le fesoasoani i lalo i i, ave i ai le fesoasoani, ae aua ne i avea faapea o le lape o oe o le a e le alu ai i i ona e te falepuipui soo. E le

avea le faavalevatea aua a tuu i se isi itu, e i ai le tagata foi lea e falepuipui ona alu lea poto mai o ona sau lea e le maua.... E le faapea ua sui le amio, a ua poto e soli le tulafono ia aua ne i maua. Ae i ai foi le tagata o le vale lava ia e maua o le faavalevatea. A o le naunautai la Afioga, ia maua le avanoa o e e molia i le tulafono pe a faapea e talafeagai ma le tulafono.

O le vaivaiga mulimuli la la Afioga lea foi sa saunoa i ai le Afioga i le Palemia, saunoa foi i ai sui usufono i le Tulafono Tau Faaofi lea ma lona auga ia maua e tagata matitiva ma le tagolima le fesoasoani faa-loia i le civil po o le criminal. I laua vaai i ai i le Tulafono Tau Faaofi, ae faamalie atu foi la Afioga i le Fofoga Fetalai ona o Tulafono Tumau a le Maota e le tataua ona e tilotilo i se upu po o se mea se i vagana se taimi mulimuli. Ae mo le faafaigofieina, i laua vaai i ai, o le upu lea e faaoga i totonu o le Tulafono Tau Faaofi o le entitle, i si ou manatu vaivai i mea tau loa. E eseese uma lava manatu o loa, ese lava foi le vaai a Faamasino. A talanoa i le upu lea entitlement i lou malamalama faa-loia, e mafai ona ou finau po o le a le fai mai na o le tagata e le au lona totogi i le \$5,000 i le tausaga e alu i lalo i i, e mafai ona ou finau faa-loia i luma o le Faamasinoga, e sao, e tea ma le \$5,000 i le tausaga le totogi o le tagata lea ou te sau ai. Ae a tatou vaai i le Faavae, o la e fai mai le Faavae e i ai lana aiatatau ia i ai sana loa i le Tulafono. Ona ou fai atu lea o laua finauga, ua tea ma le \$5,000 lea tou te fai mai ai, ae manao la tagata lea, se tamaitai po o se alii i se loa e \$400 i le itula lona tau, ona e i ai lona talitonuga o le ituaiga loa lona o lea e manao ai.

O le upu ou te faaogaina o le eligible. Aua a eligible la, e le oo le finauga i le upu lea o le entitlement. O le entitlement ua tatou finau i mea e tau o rights. Ae a eligible, ona manino lava lea o le eligible a e le pau i totonu o le mea la e fai mai ai le tulafono e eligible e leai foi ni finauga i le entitlement. O nai manatu ia la Afioga i le Minisita ma le Malo.

O se manatu mulimuli, o isi foi atugaluga sa talanoa ai ou uso a sui usufono ia, o le manaia ia o le Tulafono Tau Faaofi, ae tataua foi ona agavaa alii ma tamaitai loa o le a o i le Matagaluga lea e faatino le tulaga lea, ona e le gata ina tatou iloa i le olaga lena, a o mafaufauga foi i tagata lautele, ona e eseese. E tai pei foi o foma ma accountants ma isi tulafono, e i ai loa e sili atu isi loa i isi loa, ae ia talafeagai le malamalama ma le tomai ma le agavaa o e o le a o e faatino le mea lea, ma isi foi loa sinia o i ai i le private sector. E le o se mea lelei mo le tatou faamoemoe lea, ae maua i le mea foi lea e maua la loa, le au vaega taugofie foi lea e faale-poto tele i le loa lea e i i. I laua vaai i ai ananafi sa tatou talanoaina po o le a le mea e 8 tausaga ai e ala ai ona loa le tagata ona faatoa mafai lea ona alu e fai sana private practice. O le eseese o mea ia e lua, e 8 tausaga faatoa fai laua private practice pe a e manao e solicitor, leaga e fai le trust account. A o le mea lea o le barrister, e mafai lava ona e iu mai le Iunivesite nei, taeao e alu e barrister. E le manaomia se 8 tausaga. O le tulaga lona ona o lea o le a o i le Tulafono, e manaomia la ni alii ma ni tamaitai ua latalata i le taimi lona, po ua oo le tomai i le tulaga o lea ua i ai loa sinia a le Ofisa o le Loa Sili faapea foi loa ia i le private sector.

Lau Afioga i le Fofoga Fetalai, faafetai lava mo le avanoa.

FOFOGA FETALAI: Ia malie lava le sui usufono mo Vaisigano Nu.2, se i avatu muamua le avanoa i le Minisita mo Tina ma Tamaitai, Atinae o Nu

ma Afioga ma Agafesootai ona avatu ai lea o le avanoa mulimuli mo nisi sui usufono ia e fia tutulai mai.

Tulai mai le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Faafetai i lau Afioga i le Fofoga Fetalai faapea foi le ee o le paia maualuga o le Palemene i le afio o le Palemia ma le Kapeneta, e faapea foi le la Itu. Ua ala ona ou tulai ona sa sau i nisi o saunoaga le galuega faa-Komesina o Sulufaiga, ona o au o le Minisita o lea foi vaega o le auunaga a le tatou Malo. Ou te matua faafetai atu lava i le loia faatoa mavae atu nei, na pau lea o le loia ou te iloa e potu, ma e potu atu i le isi lava vaega tele. Aua o le mea lea e i ai, ua tatai solo lava le mataupu, a o lea e manino le Tulafono Tau Faaofi. Ana faitau lelei i le Tulafono Tau Faaofi i le uiga tonu o le Tulafono Tau Faaofi, ou te iloa e le tele ni lauga faapenei e tetee. A o le galuega faa-Komesina o Sulufaiga, e vavamamao lava ma le galuega a le Komiti lea po o le public advocate foi lea e faauluulu i ai le centre. Se i vaai i ai i le mea o le centre, e le o se Ministry e le o se Corporation, o le centre le mea. E le toatele ni tagata faigaluega e lagolago ai le galuega faa-Faamasinoga.

A o le galuega a le Ombudsman, oka, human rights – a tau loa mea tau human rights o le lalolagi atoa. O mea tau suesuega o leoleo, e le faia e le Komiti lea galuega o le suesueina o faaletonu o leoleo. O le Matagaluega foi lena o le matua tele lava. O tagi a tagata faigaluega a le Malo, o tagi a Faalapotopotoga, o mea uma na. Se i tagai la i ai? A o le mea lea na o nai tagata vaivai o le atunuu e fia maua le fesoasoani a ua molia, se ta te ofo se ia te outou? Matua outou matutua ae matua leaga tele outou mafaufau. O le faamatalaga lea.

Tofa Levaopolo Talatonu: Lau Afioga i le Fofoga Fetalai, ona o au lea e faasino i ai le saunoaga a le sui usufono lea....

FOFOGA FETALAI: Ona ua tatou taunuu i le tatou taimi malolo, tatou taliu mai faaauau le tatou finauga. Ou te faasilasila atu ua faataatia ese Taualumaga a le Fono Aoa mo lana malologa masani o le taeao.

Na faataatia ese Taualumaga a le Fono Aoa mo lana malologa masani i le itula 10:44 i le taeao ma toe faaauau i le itula e 11:25 i le taeao.

Na toe faaauau felafolafaiga i luga o le faitauga faalua o le Tulafono Tau Faaofi o le Ofisa Autu o Mataupu Faaletulafono mo Tagata Lautele 2014.

FOFOGA FETALAI: E momoli atu le agaga faafetai i lena vaega o le tatou aso. Ou te manatu o lea ua maea le tatou tautega, e i ai foi le talitonuga ua maua la outou faasiliga malosi, e le gata i le tatou malutaeao a ua maua foi le savili manaia i fafo i le tatou nofoaga nei i le tatou Maota i Tiafau. E faasoa ai foi ma faatalofa atu ai foi i nisi o le aufaasalalau, e i ai nisi o outou ua agai foi i luga o Televisi. Faamalo atu le lavapapale i le tatou Maota. E faia le

tatou malologa o lo o i ai nai sui usufono o lo o totoe. Ae tulai mai le sui usufono mo Vaisigano Nu.2 ona faai mai lea e lea Itu o le Maota. Tulai mai lau Afioga i le sui usufono mamalu.

Tofa MOTUOPUAA UIFAGASA AISOLI VAAI (Vaisigano Nu.2): Faafetai i lau Afioga i le Fofoga Fetalai mo le avanoa e fai ai foi sina leo aua le Tulafono Tau Faaofi ua i le Maota nei.

Lau Afioga i le Fofoga Fetalai, e ala ona ou fia tautala i le Tulafono Tau Faaofi lenei, ona o au le isi tagata sa matua lailai i mea nei o loia, ioe. O lau tala sao lava. Na oo lava ina ou avea ai le loia i le Law Society, e aumai le pili a le loia, o le tau o le taavale fou. E le o i inei la o Niu Sila lea ou te talanoa atu ai. Ae tau faapena foi loia i inei. E ui i lea, na ou manumalo, na toe refund le tele o au tupe. O lea la e i ai le Tulafono Tau Faaofi lea ona tatou mafaufau ai lea i le le tagolima o le tatou atunuu pe a mafaufau lava i mea nei o loia ma latou fees po o latou pili. Ou te le iloa po o fea e omai ai ma nei ituaiga figures e fai ai latou pili. Ia vaai foi, o le mea lena e eseese ai ma matou nei fomai. O matou fomai, o se taotoga o se mai o le a oti, ia e na o si au alauni lava \$30 i le po, ae toe foi lava i lou soifua lelei. A o le loia, ia, e tasi le po ae aumai le pili e \$10,000. Faafetai i le Malo, faafetai i lau Afioga i le Tamaitai Minisita, ua aumai se Tulafono Tau Faaofi faapenei se i fesoasoani atu ai i si o tatou atunuu. Ae pau lava la le mea, e pei o se mea fou le mea lenei, aua nei model ina pei ona saunoa se tasi o sui usufono mo Faleata Sisifo, pei o le mea foi lea aua ne i model ina i mea faa-Ausetalia, aua na ona aumai fau fau ae fai lava se tatou model faa-third world country. O le tele o tagata tatou, e matua le afford ina lava nei mea o loia. E matua le afford ina le loia. E fai o le totogi o le loia, uma ane e falepuipui, ua matua atili gau ai lava. Ia o lea la lau Afioga i le Fofoga Fetalai, ou te matua lagolagoina le Tulafono Tau Faaofi lenei, ae pe faapefea ona faatupe. O le mea lena e pau atu i le Malo, vaai mea o CSOs foi ia, aveifo e matua... o le tele o mea o loia lea ua iu mai nei, e leai ni galuega, aveifo tai sefulu tai sefululima loia e tuu i totonu o nei law centre e fesoasoani ai i le tatou atunuu aua le taugata o pili o nei mea o loia, ma le manaomia o le fesoasoani faaetulafono.

Ia, e pei o se manatu puupuu lea ne i te i ua umi le tatou Fono. Ia manuia le tatou Fono lau Afioga i le Fofoga Fetalai.

FOFOGA FETALAI: Malie lava Tuiatua se i avatu muamua lava le avanoa i le Minisita mo Galuega Tau Alamanuia ma Atinae a le Malo. Tulai mai lau Afioga i le Minisita.

Afioga Hon LAUTAFI FIO SELAFI PURCELL (Minisita mo Galuega Tau Alamanuia ma Atinae a le Malo): Lau Afioga i le Fofoga Fetalai, e tulai atu e fia fesoasoani i le tatou mataupu o lo o falo nei ona e i ai foi si tamai tomai laitiiti foi i le mataupu lenei tau Community Law Centre. O le tomai po o se atamai laitiiti o ia te au, sa ou faigaluega ai i le mea lenei o le Community Law Centre i Niu Sila. E pei o le upu lea e silisili lava ona taua i le Tulafono Tau Faaofi lenei, lea peiseai e le o mamafa i sui usufono ua maea ona saunoa, o le upu lea o le Community. O le Community, o tagata lautele. O le upu lea e taua tele i le Tulafono Tau Faaofi lea. O le a la le uiga o le Community Law Centre? O lona uiga, o le Ofisa o Loia e agavaa uma i ai tagata lautele.

O lou experience mai Community Law Centre sa ou fesoasoani i ai, o i e afe gofie e tagata foi nei e le masani ona i ai ni a latou loia, e fefefe e o i totonu pei o saunoaga i le taugata o loia, ma e faafaigata foi lea ia latou ona o e vaai se ofisa loia i sana mataupu. O lou foi iloa i lou experience, e le faapea na o tagata solitulafono lea e o i le mea lea. O le tele ia o mataupu a nai o tatou tagata i Niu Sila e o ai e manaomia se fesoasoani po o se faamalamalamaga a loia mai le centre lea, e available lava loia. O le isi foi mea taua, o le tele o loia e faigaluega i totonu o le mea lenei, o galuega e fai fua, e voluntary a latou galuega. E le faapea la e popole i le o atu po o a ni tau o le a tuu mai. O isi ofisa loia tetele lava i Niu Sila, e i ai latou loia e ave i le mea lea o le Community Law Centre e provide ai a latou community service, e tolu i le fa itula i le vaiaso, uma ia loia mai lea Matagaluega ma lea Ofisa Loia. O Ofisa Loia tetele, e le o ni tamai loia foi e faigaluega i i. O isi o head lava o kamupani loia e omai e fai le latou community service. E pei o le agaga lena o centre faapenei, e fesoasoani i tagata lautele without fear i le tetele o ni totogi e tapa. O le tele lava o loia nei e leai se latou totogi e tapa. O le latou community service lena i le atunuu. Atonu la o le faamoemoe foi lena o le Tulafono Tau Faaofi lea e taumafai atu, a establish loa i lalo o le fund lea a le AusAID, ia ona taumafai lava lea o le Advocate ma lana staff e sue ni a latou tupe e sustain ai le tatou ofisa lea, sa masani ona fai a matou mea foi ia vaeane lava le...mea o papakiu sosisi o sausage sizzle, o car wash, o mea na matou te o fai e lagolago ai le community centre lea, ona o lau galuega sa i ai e tele lou piitaga foi lea i le au solitulafono, pei o lea na talosaga mai lea le Centre lea, ou te alu atu, ia sa ou alu foi ou te volunteer i ai, e talanoa la ia i latou ia e omai i fafo ma le falepuipui, e tele ia tulaga e manaomia ai lava e nai tagata ia le fesoasoani faa-Loia, e le o le fesoasoani lea e taua o le Ombudsman e eseese lava le Ombudsman ia ma galuega lea e fai i i i le tulaga lea.

E pei o le faaalualuga lena o sina au experience leaga o lea e fou mai le idea, e ese lava foi le Community Law Centre ese lava le Legal Aid la e manage foi e le Courts. O le mea lena mo le au solitulafono lava ia, o i foi e i ai lava i latou e solitulafono ae fuafua lelei lava i lalo o fuafuaga pei o lea ou te tilotilo atu i i o le Manager o le centre o le Public Advocate lea ou te vaai atu pei o latou na o lea e managing le ofisa lea i lalo o le vaavaaiga a le Komiti.

O le fesoasoani atu lena lau Afioga i le tatou mataupu na ona tuuina atu o nai manatu e faufau ai le tatou Tulafono Tau Faaofi nei, ma lou faaaloalo lava.

FOFOGA FETALAI: Malo faafetai fesoasoani mai i lau Afioga i le Minisita.

Tulai mai lau Afioga i le sui usufono mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai lava i lau Afioga i le Fofoga Fetalai, masalo e leai e le tele se leo ua maea foi ona faaalua le tele o finagalo o sui usufono mai i lena itu o le Maota e faapena foi ma le tatou itu.

E pau lava le tulaga na ou tulai atu ai ma le faaaloalo lau Afioga o le vaega lea tau tupe lea sa saunoa nei le Afioga i le Minisita e uiga i mea o Neighborhood Law Office i Niu Sila. E moni lelei lava le saunoaga a le Minisita, ua uma foi la ona fai lau fesili lau Afioga i le Minisita a o faia le

tatou malologa sailiga malosi, o lea la ua silafia e le Afioga i le Minisita, ia ae malie o le a tuu atu pea leaga o lea ua aumai le avanoa ia ma ua leva lava ona ou taumafai atu ae le i maua sou avanoa.

O le mea muamua, sa ou fesili ina ua taumafai mai le Tulafono foi lea e fai ai le tatou fesoasoani mo loia le legal aid i le Ofisa o Faamasinoga le tupe lea e ave i ai e le Malo e faasafua mo tagata e vaivai le seleni. Ae sa ou fesiligia lava ma ou faanoanoa i le tulaga sa i ai lea tupe, aua pei e foliga mai e faaituau lona vaega ona o le itu lenei, e na o tagata foi ia e solitulafono e ave i le Faamasinoga Maua po o le Supreme Court e eligible pe agavaa mo le fesoasoani tau tupe lea o le legal aid po o le fesoasoani faaetulafono e puipuia ai ia tagata ua molia i le solitulafono mamafa. I lou lava la manatu i lea taimi ina ua fai mai le Tulafono lea, pe faaituau le uiga o le Tulafono e na o tagata solitulafono mamafa, a o le Tulafono Tau Faaofi la lea ua aumai nei, e matua lagolagoina malosi e lou sui usufono, o le a ou le toe faaluaina finagalo o nisi o sui usufono ua uma ona saunoa ai, ae na o nai manatu lava ia e lagolago i lau Afioga i le Minisita atonu e tuualalo atu pe aoga pe le aoga, ia a o le mea sili ua avatu, o le mea muamua la lena pei ona ou taua o le tupe. Sa ou faapea lava au ia Law Office o mea o Community Law Centre i Niu Sila pei ona saunoa le Minisita, e fai a latou sailiga tupe, pei o papakiu ma mea faapena, e i ai foi ma latou tupe e avatu faameaalofa i nisi o isi Law Firms tetele po o Ofisa Loia tetele e le gata i lena ae faia lava foi ia grants foi ia pe aumai le fesoasoani mai le Council, ia po o isi vaega o lala o vaega tumaoti e aumai ai a latou seleni e fesoasoani i le faiga o latou galuega.

A o lou la manatu ma le faaaloalo talu ai o lea e i ai le Ofisa Autu po o le Advocate lea e taua mai i le Tulafono Tau Faaofi, na o se tuualalo lau Afioga ae le fai ai, pe a pe a aumai le tagata lena e totogi e le Malo lea lava e i lalo o le Ofisa o Faamasinoga, ia ae sau pea le tatou funding lea ua alu i lalo o le legal aid faatele laitiiti le vaegatupe lena ona vavae mai lea o se vaega e fai ai le vaega o le Ofisa lea ma le toe tau faatu o se isi ofisa. Aua i lou talitonuga ma le faaaloalo, o lea ua i ai ia le CEO o le Matagaluega, o lea foi o le a i ai le law advocate e na te vaaia le vaega lea o Tulafono so o se tulafono e ese mai ai i tagata vavae adoption, o le tatalaina o faaiipoipoga ia ma isi tulaga faapena o lea e le o aafia i lalo o le Tulafono lea tatou te talanoaina nei. A faapea la e aumai le vaega lea i lalo e faasoasoia pea e le Matagaluega o Faamasinoga e le CEO tuu mai sina vaega mai le legal aid e vavae ese i le Advocate mo le faasoasoina o Loia.

O le isi fautuaga lau Afioga ma le faaaloalo o lea sa maua foi i nisi o lauga, o le mea lea o le faigata ona tauva ia ni a tatou Ofisa Loia Tumaoti ia ma lea vaega foi o le auaunaga, aua afai o le a tauva, ia ua defeat atoa le purpose e ave ai le mea i le private sector i loia ia e fai a latou private practice. Pei o le tasi lena atugaluga, ae leai o lena e i ina le tofa ma le utaga e fuafua ai foi lea tulaga.

E pei o nai manatu ia e tuualalo atu ai i lau Afioga ma le faaaloalo. Manuia le Fono.

FOFOGA FETALAI: Malo faafetai. Ia e manatu o lea ua maea sui usufono sa.....oi le sui usufono mo Aiga i le Tai, sa e fia saunoa? Le sui usufono mo Sagaga le Falefa, se i tulai mai le sui usufono mamalu ia ona tali ai loa lea o le Minisita.

Tofa TUISA TASI PATEA (Sagaga le Falefa): Faafetai mo le avanoa, ia masalo toe tasi lava lenei itu ia ona maea loa lea faafetai lau Afioga i le Fofoga Fetalai.

Ou te tulai foi e faailoa le lagolagoina o lenei Tulafono Tau Faaofi, e muamua ona faafetai i le Afioga i le Minisita aemaise foi le faauluuluga o le Matagaluega ma le mamalu o le Matagaluega mo lenei Tulafono Tau Faaofi e ese le taua. E talitonu o le taua o lenei Tulafono, pei ona aumai i lalo o le Faavae ua silafia foi e le atunuu le aia tatau a le tagata i le Faamasinoga amiotonu le righteousness to justice. O le tulaga o lo o i ai nei, ia pei lava e foliga mai a tele au seleni ua tele foi lou avanoa e te access ai oe i lena aia tatau, ia a o nai tagata o le tatou atunuu le lautele o le atunuu, e le o maua le access lea, ia o i latou tonu ia ua tatau ma onomea i ai lenei Tulafono Tau Faaofi fou. O le faataitaiga lava masalo pe silafia foi e nisi o loia le toatele o i latou e le o mafai ona maua ni loia o lo o i le Court, na ona tupu lava o le faaletonu, tasi lava le mea e silafia e le tagata na o le fale Faamasino ma leoleo ia na logoina atu e o atu i ai, ia ae le o malamalama i le tele o nisi o mataupu ia nai nisi o tatou tagata lautele. O le aoga la o lenei Tulafono Tau Faaofi ma lenei ofisa fou o le a faatuina, o le first point of call lea, o le faufautua muamua foi lea e agai i ai o tatou tagata nei e faamalamalamaina o latou aia tatau ia e ala i le Tulafono lea. Ou te talitonu foi pei ona aumai e le vaega e 4(c), o lena e faamanino mai le tulaga lena, a maea ona filifili loa lea o le tagata ia pe alu e sue se isi ana loia taugata ia pe nofonofu ai pea i ina i le fesoasoani a le Community Law Centre. O le isi foi itu taua o lenei Tulafono Tau Faaofi i le maitau atu, ou te talitonu o le a faafaigofie foi galuega a le Matagaluega ia i latou o lo o faatinoina ia le fuafuaina o Faamasinoga. Aua ou te talitonu o le tele lea o i latou o le tatou atunuu o lo o agai ai i o ona o le lē malamalama o nai nisi o tagata – ma atili faatele ai foi galuega ma le vevesi o le Matagaluega pei lava foi ona faaalua e le Afioga i le Pule Sili o le Matagaluega i le taimi na talanoaina ai lenei Tulafono Tau Faaofi, ae ou te talitonu, a i ai le tatou Community Law Centre lenei, o lona uiga o i o le a focus i ai le auvaega ia e le o malamalama lelei, ia o i ina foi o le a aumai ai le faufautua mo i latou i le mea e ao ona fai. E pau lava sina faafitauli o lo o i ai i lou talitonuga o le Oversight Committee, ou te talitonu e na o le toatolu na o lo o i ai i ina, ia ua fai sina laitiiti i lou talitonuga ia e fono lava le toalua lena pei ona i ai le quorum line lena o lo o aumai ai i ina, ae i ai le talitonuga e tatau ona faatoatele laitiiti lena fuainumera.

Ia e toe avatu ai foi se faafetai tele ma le lagolago atili i lenei Tulafono Tau Faaofi taua aua o tatou tagata, faafetai.

FOFOGA FETALAI: Malo. Ia tulai maia lau Afioga i le Minisita e ana ia le Tulafono Tau Faaofi e tali faaiu, ia ona faasolo loa lea o le tatou Tulafono mo lenei aso.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai faapea foi sui usufono mamalu o e sa saunoa foi ma faaalua ia finagalo i lenei Tulafono Tau Faaofi.

Ou te manatu ou te le tali auiliili i mataupu sa laga mai, ae ua ou vaai i se tulaga foi lea i le aoatotelega o manatu ua faaalua. Pei o le vaega muamua ou te fia tali atu i ai, o le tagata lea e faufautua po o le Public Advocate, i le tuu faafeagai lea ma le Ofisa o le Loia Sili. Ia lau Afioga i le Fofoga Fetalai,

atonu o le faa-Peretania o le Tulafono o le Public Advocate e tau maua mai ai le agaga o le faufautua lea o le faufautua mo tagata lautele, ae moni o le afioga i le Loia Sili o le Faufautua lea mo le Malo, e tau lava ina faamanino ia lena itu. Atonu ua tau o le Faufautua a le Malo ona o lea e faavae le tofi i lalo o le Tulafono lenei - ma atonu a outou silasila foi i ai i vaega o le Tulafono mo le tofia o lea tofiga, ia o lo o faia i lalo o le fautuaga e tuuina atu e le Kapeneta i Lana Afioga Mamalu, O Le Ao o le Malo, o lona uiga e tau mai ai i ina, o le tagata faigaluega a le Malo, ae galue e faufautua mo tagata lautele.

O le isi vaega pei ona aliai mai i le aotelega o finagalo faaalua, o le faapea mai, pe moomia moni lea auunaga, do we need the service, ona o lea o lo o i ai pea auunaga i vaega eseese o le Malo po o le Matagaluega po o le tatou Ofisa foi o Leoleo.

Lau Afioga i le Fofoga Fetalai, e pei foi ona ou talanoa atu ai i le faamalalamalama o le Tulafono lenei lea na ou faapea atu ai, ua siitia le auunaga e ala atu i le nei Ofisa Tutotonu o le a faavaeina i lalo o le Tulafono lenei, e moni, e le faapea foi o faaletonu ia le auunaga o lo o tuu atu, ae ese foi lea vaega o le auunaga e lagolagosua ai pea i le mau sa saunoa i ai le sui usufono faatoa faamaui atu nei lona tootoo, i le avanoa tutusa lava lea o tagata mo mataupu faale-Tulafono po o le amiotonu. Ma o lo o lualuagia lena lagona po o moomia lenei auunaga ma manatu, pe le o i ai isi vaega o le tatou Malo o lea o lo o faatino ai le fesoasoani lea.

Lau Afioga i le Fofoga Fetalai, e le o faatino e nisi vaega o le Malo le ituaiga auunaga lea o le a galueaiina i le tatou Law Centre lea. O le legal aid, o se fesoasoani mo le tau o Loia mo Faamasinoga, e i lalo o le Matagaluega o Faamasinoga ma ua i ai foi faiga faavae o lena fesoasoani – ma e pei ona taua foi e nisi o tootoo e faagaaga lea mo le tatou Faamasinoga Mauauga i soligatulafono mamafa. Ma o ituaiga soligatulafono na e taugata, ae pei foi ona malie i nisi o saunoaga ua faaalua e i latou o e ua silafia foi le ituaiga galuega e faatino i totonu o auunaga faapenei, pei o nai Tulafono foi lea e fesoasoani ai i aso faipea i tagata po o le a le Tulafono e fai ai nei mea o tiute o taavale ma ituaiga mea faapena e fai ma faataitaiga. E le na o tiute o taavale, ae e mafai foi ona lagolago i tagata i le tele o le mau Tulafono o lo o aiaia ai mau gaoioiga eseese i totonu o lo tatou atunuu i mea a le Malo po o mea foi a kamupani lea lava o lo o aiaia i le mau Tulafono o lo o i ai nei.

Na taua ai foi le Ofisa o le Komesina o Sulufaiga, lau Afioga i le Fofoga Fetalai.....

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: O le a tuuina atu le avanoa pe a maea le folasaga a le Minisita. *(I le sui usufono mo Faleata Sisifo o lo o tulai).*

Tofa Lealailepule Rimoni Aiafi: O lea ua oo tonu le saunoaga a le Afioga i le Minisita i le mataupu lea sa ou laga pe a talafeagai ai i le Legal Aid.

FOFOGA FETALAI: Ou te masalo ona o lea e le i maea le saunoaga a le Minisita, aua masalo e oo lava i ai, ae a i ai loa se mea e le taua ona avatu loa lea o le avanoa.

Afioga Hon FIAME NAOMI MATAAFA: Lau Afioga i le Fofoga Fetalai, ona pei lea ua faapea mai pe a le Ofisa o le Komesina o Sulufaiga ae tuu atu i ai. Atonu o lea ua saunoa le Minisita e faasino tonu i ai lea Ofisa, ae sa ou faapea po o le a ou tulai atu i le taimi na laga mai ai ona e matua sese lava lea mau. E matua eseeese mamao lava galuega a le Ofisa o le Komesina o Sulufaiga ma le tatou Law Centre lea.

O le Komesina o Sulufaiga e sulufai i ai tagata ua le mafai ona faamalieina o latou manaoga ona ua uma faiga. O faiga faavae a le Malo, o Ofisa ma le Faamasinoga, ae peitai, e le mafai lava ona faamalieina le tagata, ona tagi loa lea i ina i le Komesina o Sulufaiga, ae e leai ni galuega faaloia e fai i le Ofisa o le Komesina o Sulufaiga, a o galuega suesue pe na lelei faatino auuaunaga sa oo i ai le tagata lenei ua oo atu i lo latou Ofisa mo se fesoasoani.

FOFOGA FETALAI: E faamalulu atu i le sui usufono mamalu, se i tuu pea le avanoa se i tali le Minisita. A maea loa e i ai ni mea e le i faamalieina ai, ona avatu loa lea o le avanoa. O lea e faasolo tali atu a le Minisita.

Tulai mai le Minisita e saunoa.

Afioga Hon FIAME NAOMI MATAAFA: Lau Afioga i le Fofoga Fetalai, i le vaega lava lea muamua i le aotelega o finagalo ia e aumai i le fesili pe moomia lenei auuaunaga. O lona lua, pe e le o i ai nisi vaega o le Malo e mafai ona tuu atu i ai e pei o le Matagaluega o Faamasinoga i lalo o fesoasoani i le Legal Aid po o le Ombudsman Office? Ou te manatu lau Afioga i le Fofoga Fetalai, o le auga o finagalo ia ona o le mafaufauga e faapea ua toe faaopopo mai foi isi tau i le Malo ma ana tupe e faagalua. Lau Afioga i le Fofoga Fetalai, e pei o se faiga lelei lea i le faaogaina o tupe a le Malo.

Lau Afioga i le Fofoga Fetalai, o faiga faavae a le Malo ina ia maua lava avanoa tutusa o tagata uma, po o fea lava le vaega o le Malo o lo o galue. E oo mai lava i le vaega lenei o Faamasinoga, o Tulafono ma le Amiotonu aua a le maua e le tagata soifua le atoatoaga o lana aiatatau i matata nei po o mataupu nei, e ese le tele o le afaina o lona soifua. O le faataua lena o lea e ave i ai e le Malo i le faavaeina o lenei centre fou.

Lau Afioga i le Fofoga Fetalai, o lena ua saunoa atu nisi e masani i ia ituaiga auuaunaga o community centres. E moni e le alofia le faaalu o tupe a le Malo ma ua tatau foi ona faaalu, a o le agaga lava ia e pei ona i ai le faiga faapaaga ma loia, o le isi itu e faatupe ai nei ituaiga auuaunaga o fesoasoani. E amata mai lava i le Malo aua e tatau ona amatamea le Malo, ae maua mai foi fesoasoani mai a tatou paaga ma nisi tagata o lo o agalelei mo lea faamoemoe.

Lau Afioga i le Fofoga Fetalai, o lau tali atu lena i na vaega muamua o mataupu sa laga mai. Ioe, e moomia le auuaunaga ma e leai, e le mafai ona faatino i isi itutino o le Malo ona o la foi e galulue latou i matata faapitoa e le aofia ai le galuega a le community centre.

Ona ou oo mai ai lea i le isi vaaiga lea e pei e tau maua mai i le aotelega o saunoaga e faapea, o le a tele lava se afaina o le aufaipisinisi. O ai la le aufaipisinisi lea tatou te talanoa i ai? O lea tatou te talanoa i loia. Lau Afioga i le Fofoga Fetalai, o le isi itutino taua lea o lea e tuu mai i totonu o le Tulafono Tau Faaofi lea, o le Sosaiete a Loia ma o se faiga faapaaga aua e moni, o loia o tagata faipisinisi, a o tagata soifua foi e fia fai le latou

auaunaga mo tagata lautele. E leai se agaga o le Tulafono Tau Faaofi lenei e faapea o le a faaleaga ai pisinisi nei ona o lea o le a faoa ai le galuega. E leai o lea o le a fai i ai, aumai outou tauau, lagolago mai i le faamoemoe lenei. Mo ai? Mo tagata lautele.

Lau Afioga i le Fofoga Fetalai, e pei o lea o le a tatou faitau i totonu o le Tulafono Tau Faaofi lenei i ni uiga e le o i ai, ma e le o i ai foi se faamoemoe e faaleaga pisinisi a alii ma tamaitai loia, a o le mea lea e manaomia o le latou lagolago mo lenei faamoemoe.

Ona tatou oo mai ai lea i le agaga lea e i ai i totonu o le Tulafono Tau Faaofi lea e faapea o le tagata faigaluega galue fua po o le volunteer. O lea tatou te malamalama uma i le upu lea volunteer o le galue fua e aunoa ma se tologi, a o lo o i ai foi aiaiga i totonu o le Tulafono Tau Faaofi, a faapea e talafeagai le i ai o se tau, ona fai lea o le fuafuaga i auala ua saunia. E pei e lualuagia le tulaga lea o le galulue fua po o i latou foi o lo o galulue ae maua so latou tau ma talanoaga ia e faia i luga o tologi ia e tau mai i totonu o le Tulafono Tau Faaofi. O le mea moni lava ia, o tologi po o fees ia o lo o i totonu o le Tulafono Tau Faaofi lenei, o nai mea laiti foi ia e faatino ai kopi o pepa, o le fai o peni ma le taimi o administration cost e galueaiina ai se mea. A o le faamoemoe lava ia o le autu, o galuega faaloia pe a faapea o mataupu faatulafono e faamoemoe lava i le galulue fua ma le lagolago mai o le vasega o loia, ae a tataua lava ona fai se tupe, o lea foi o lo o sauni i ai le tatou Tulafono Tau Faaofi.

Na aafia mai i saunoaga a sui usufono le talanoaina o mea nei o lala po o sectors e i ai le Law and Justice Sector lea o lo o faatulaga mai ai fuafuaga mo lo tatou Ofisa Tutotonu po o le centre. O se faiga lea a le Malo ua tuufaatasia ai Matagaluega ma itutino eseese o le Malo e tai tutusa a latou auaunaga ma autu o lo o latou tuliloa. E fai lava la ma faataitaiga le Law and Justice Sector. O vaega autu o lea vaega o le Matagaluega o Faamasinoga, o le Ofisa o Leoleo, o le Ofisa o le Loia Sili, o le Ofisa o le Law Commission ma key agencies foi ia a tatou aua e le mafai lava ona aveesea le PSC, o Tagata Faigaluega ma le Ofisa o Tupe aua tupe faasoasoa. E i ai uma lava sui o Matagaluega i totonu o Komiti Faafoe. O Steering Committees ia o sector eseese e i ai foi i totonu o le sector lenei o le Law and Justice Sector.

O le lala la o se auala e faatino ai galuega faale Malo ma o lea ua alu lenei Paeaiga, na amata i le Paeaiga talu ai ona amata ona faatino galuega a le Malo faapea. O le agaga o le faatulai mai o lala po o sectors, ina ia faaleleia atili ai le galulue faatasi o itutino eseese o le Malo i lo le mea foi lea o le tuliloa lava e le Matagaluega ia po o lea itutino o le Malo ana galuega, ae e tau tatai mai ina ia mafai ona fai faatasi se vaaiga e tuliloa ai autu lelei mo lea vaega ma lea vaega o le Malo.

Lau Afioga i le Fofoga Fetalai, e pei o le aotetega lena o manatu i lau matau atu i saunoaga a sui usufono, a o le autu lava o le Tulafono Tau Faaofi lenei, o le vaaiga foi lea e tutusa lava tagata uma i luma o le Tulafono, aua a le lava le tupe a le tagata e tologi ai lana loia, ua le maua la le tutusa lena. O le va la lena o lea e tuliloa e le Tulafono Tau Faaofi lenei ina ia fesoasoani i le lautele o le atunuu ina ia mafai ona faataunuuina a latou aiatatau faaletulafono.

Ma le faaaloalo lava.

FOFOGA FETALAI: Malie lava lau Afioga i le Minisita, o lo o i ai nai sui usufono ia na tutulai mai.

Tulai mai le sui usufono mo Gagaemauga Nu. 2 ona sosoo ai lea ma le sui usufono mo Faleata Sisifo.

Tofa Levaopolo Talatonu: Faafetai lava i lau Afioga i le Fofoga Fetalai. Ou te masalo e le i maua lelei mai e le Afioga i le Tamaitai Minisita le tuualalo. Sa faaleoina foi le lagolagoina o le faamoemoe. Na o le pau lava lea o se tulaga sa tau faaali atu ai se manatu ma tuualalo atu, o se amataga. Ona e foliga e tau talafeagai ma tutusa tiute tauave. E amata mai ai i ina as a división, ona tatou fuafua lea i ai po o se mea e moomia tele e le atunuu lea vaega pe leai. Ona o lea foi tatou te fua i le tatou Mediator lea e faamoemoe e manaia ona faataoto e le Malo, ae pei e le o lelei tele foi ona o la e pei e prefer tagata uma i le Court. E pei o le tasi lene vaega sa tau avatu ai se tuualalo i le Afioga i le Tamaitai Minisita.

O le mea lea ua saunoa i ai le Tamaitai Minisita o le Komesina o Sulufaiga, e sulu i ai le tagata ua le faamalieina i se mataupu. A o lau tilotilo i le tatou Community Law Centre lea, afai nei ua molfa au e leoleo, ua faamatala mai le uiga o le moliaga ae le malie i ai lou loto, o i ina la ou te agai i ai pe afai ua le faamalieina au i se moliaga e tusa ai ma ala o le Tulafono. Ou te alu e faamalamalama mai pe o sao le moliaga o au. E pei o le mea lene na ou fai atu ai, e tali tutusa mea ia e lua. Na o se mea lava e tuu atu i ou tafatafa pe e le ao ona amata mai ona o i latou ia o lo o i ai le tomai. O le tasi lene vaega sa ou tautala i ai, o le Komesina o Sulufaiga ona ua i ai le tomai faapitoa i mea ia. O lo o manino mai i le Tulafono le tulaga o se Ofisa Loia. E pei ona saunoa le Afioga i le Minisita, o i ina e i ai loia ma o le mea tatau lene. Afai nei la e leai ni loia i totonu i ina e malamalama i le Tulafono.....

Afioga Hon FIAME NAOMI MATAAFA: Lau Afioga i le Fofoga Fetalai o le mea e fia faasao.

FOFOGA FETALAI: O lea ua maua lou finagalo ae se i faaauau le faamalamalama a le Afioga i le Minisita.

Afioga Hon FIAME NAOMI MATAAFA: Ou te faamalie atu i le sui usufono, e le avea lona finagalo e faapea e faasao ai le Ofisa o le Komesina o Sulufaiga e faapea ai o le sao lea, e sese lou taofi. O le Ofisa lea e faavae i le Tulafono lea e alu i ai le tagata e maua mai ai le fesoasoani mo lana solitulafono.

O le Komesina o Sulufaiga e alu i ai le tagata ona e i ai lona taofi e le i maua le tali o lona faafitauli i auala ua saunia e oo lava i le Faamasinoga. Ua le maua le tali ona e le i uia auala sa tatau ona uia. O le galuega la a le Komesina o Sulufaiga o le suesue o ala o mea na uia. A o le galuega a le Ofisa lea e faatulai nei, e fesoasoani i le tagata i ona moliaga. E le avea la le saunoa mai pea o lau Afioga i le sui usufono o le a toso ai fua lenei mataupu ma faatupu ai pea le sese o lene manatu, e le taitai tutusa.

FOFOGA FETALAI: Malo. Ou te manatu ua manino le sui usufono mo Gagaemauga Nu.2.

Tofa Levaopolo Talatonu: Faafetai lava. E leai na o se manatu lava, ae le faapea o le a fai ai, e fai lava le mea e finagalo i ai lau Afioga. A o le mea lea

na saunoa i ai le Minisita mo Tina ma Tamaitai, Atinae o Nuu ma Afioga ma Agafesootai, e tataua ona silasila mamao le Minisita i mea o tagata e i ai o latou tomai i mea tau tulafono, mea tau law. O lau fesili lau Afioga, ua e le amanaia le Doctor of Law lea e i le Palemia?

FOFOGA FETALAI: Ia, se i tulai mai le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, se i tali atu le fesili a le sui usufono. O lau faaaliga, o lo o manino lava, na agai i loia a le Itu le la, e le o aafia ai loia a le matou Itu. Se i vaai i ai i le manino o le mea a o lea lava e manao e faasese le mea. Ua leva ona ou vaai i le sui usufono mo Saleaula, leaga o lau uo, o talanoa lava ma le Taitai o le Itu Agai ma le Sui Taitai, o lea la ua sau toe pulu mai foi ae pulu mai lava e sese. Ma le faaalalo.

FOFOGA FETALAI: Lealailepule, faaii maia o lea ua manino le tali a le Minisita.

Tofa Lealailepule Rimoni Aiafi: Faafetai lava i le Afioga i le Minisita mo le faamalamalamaina o le tatou mataupu. O le mea lea e toe fia faatepa lau Afioga, pei lava o le faamatalaga i le amataga, e taua le aano o le Tulafono Tau Faaofi, ina ia agavaa uma tagata solitulafono i le auaunaga lea. O le mea lea e tupu, e \$200,000 lea e allocate e le Malo mo le legal aid. Ia manatua foi a e alu atu i le Faamasinoga, e tau mai e le Faamasinoga, fai se loia a le tama lea po o le teine lea pe afai e mamafa faasalaga. O le mea la lea ua confuse ai lou mafaufau, afai na o le \$200,000 lea e tuu i i mo tagata solitulafono mamafa, a o lea o le a set up le vaega fou lea, centre fou, aua po o le centre po o le a o le Ministry fou lava i lau tilotilo. O lea o le a set up atoa, tuu i ai ma se fia miliona e run ai, ae mama la faasalaga lea e tagofia i i. E le o mafai ona ave i ai faasalaga mamafa ia. O lea la e avatu ai le fautuaga, pe le mafai ona amatamata malie i se division foi lea i totonu, tai pei foi o le mea lea... ina ia o atu ni tagata, aua o le mea pe afai o le faiga lea na o le fautua ma soligatulafono mama. Ona la o lea ua le talafeagai nei, na o le \$200,000 lea ua tuu ese e totogi ai loia mo tagata solitulafono mamafa, ae ua matua tele tele lea mea fou o le a fai. E sao e i ai atunuu i fafo, a o lena ua faafofoga lelei lava lau Afioga i le saunoaga a le Minisita, e self funded mea ia, e le aumaia ni tupe a le Malo e fai ai, ma e donate taimi o loia e o i ai. Afai la e faapena, ia manaia. Ua e vaai i ai i le set up ina o le ofisa, e le gata i le Pule, e i ai ma le Sui Pule, e i ai ma loia, o tagata e manage ina le ofisa, o tagata uma lava ia o lea e faasolo mai i le Tulafono Tau Faaofi e faia le ofisa fou.

FOFOGA FETALAI: Ia, o lea ua maua le finagalo o le sui usufono. Tulai maia le Minisita e tali faaii.

Afioga Hon FIAME NAOMI MATAAFA: Lau Afioga i le Fofoga Fetalai, o le tatou Tulafono Tumau e tulai i luga faauilavea e faamalamalama pe faasao. E pei la e maitau atu o lo o faamalamalama atili pea finagalo o sui usufono i le mataupu lava lea faapea e amatamata malie ona o le tulaga foi lea po o le tau po o le tele o le tupe o le a alu i ai, po o le tau mataitu, pe lelei

ma aoga lea auunaga. Lau Afioga i le Fofoga Fetalai, o le mea lea ou te fia faamalamalama atu i Afioga i sui usufono, pe a fai ma faataitaiga le faapea e faavae i totonu o le Ofisa lea o Faamasinoga. O le Ofisa o Faamasinoga, o le isi ana galuega autu o le auunaga mo Faamasinoga. E feteenai la le mea lea o le faatino o le auunaga mo le Faamasinoga e susesue ai soligatulafono, ae i le isi itu, e fesoasoani i le tagata e finauina ai lana soligatulafono. E tatau lava ona tu eseese mea na e lua. E le mafai foi lea ona maua ma tuliloa le amiotonu pe a faapea e nunumi faatasi mea na. Ma ou te manatu, leai lafo maia lo outou faatuatuaga o lea foi o lo o i ai le fuafua faatatau e le gata i le Matagaluega, aemaise foi le lala lautele o le Tulafono ma le tuliloa o le amiotonu, e faatino lava i le auala talafeaga. A o le mea taua, ia amata a o i ai se Tulafono e amata ai. Aua o mea uma lava e ao ona i ai le Tulafono e fai lea ma o tatou taiala i so o se galuega e faavaeina i totonu o le tatou Malo.

FOFOGA FETALAI: Malo faafetai. E manatu ua manino ma malamalama le folasaga a lau Afioga i le Minisita. E manatu foi o lea ua oo atu le tuualalo i lea Itu o le Maota, ia ave lea i uta, tuu atu i ou tafatafa e matimati ai o lo o i ina le uta a le faimea i le tatou Matagaluega, o outou tonu o lo o faatinoa galuega i aso uma ma le Tulafono.

Na faamaonia le lafo ma faitauina le Tulafono Tau Faaofi o Ofisa Autu o Mataupu Faatulafono mo Tagata Lautele 2014 i lona faitauga faalua.

FOFOGA FETALAI: E tusa ai ma le Tulafono Tumau, o le a tuuina atu lenei Tulafono Tau Faaofi i le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa ma toe lipoti mai i le Fono Aoao i se taimi o lumanai.

TULAFONO TAU FAAOFI O LE FONO A LE AU TUSITALA MA LE AU FAASALALAU 2014 – faitauga faalua

FOFOGA FETALAI: Mo le silafia e lenei Palemene, o le Tulafono Tau Faaofi lenei sa faia lona faitauga muamua i le aso Fono Aokuso 19/8/2014. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei si tamai Tulafono Tau Faaofi lenei o le Fono a le Au Tusitala ma le Au Faasalalau 2014 i lona faitauga faalua, ma ou te fia tautala puupuu i ai.*

Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nu'u ma Afioga ma Agafesootai.

FOFOGA FETALAI: Tulai mai lau Afioga i le Palemia e saunoa faamalamalama.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Masalo o le Tulafono Tau Faaofi lenei sa tatau ona fai i le 100 tausaga talu ai. O lona uiga ua leva ona tatau ona fai, a o lea faatoa mafai ona fai i lenei taeao. Pe a ma le 20 tausaga talu ai na amata faatalanoa ai foi le Tulafono Tau Faaofi lenei. Ona alu ai lava lea i le mea foi lenei o le sii ma nofo, sii ma nofo. O lea la ua maea ona fausia ma o le uiga puupuu lava o le Tulafono Tau Faaofi, o le faavae o le Fono a le Au Tusitala, faatu pe faavae le fono a le Au Tusitala ma le Au Faasalalau po o le Council ma le Sosaiete a le Au Tusitala Samoa ina ia mafai ona i ai se itutino latou te faatonutonuina le galuega tau tusitala ina ia tausisia mea o taiala e tatau ona limataitaiina ai le tusia o tala faasalalau. Ia o le Tulafono Tau Faaofi puupuu lava lena lea e aumai ai i totonu tulaga taualoa o le aiaiga o le Tulafono Tau Faaofi mo le faatuina o le Fono lenei, e faatu ai foi ma le Komiti Faatino, faatu ai ma le asosi a tusitala ma faataoto mai ai ma auala eseese e faatino ai le galuega, faataoto mai ai foi ma auala e faafoe ai mea o faitioga a tagata, ona ua le tausisia taiala taua ma le aoga, e tatau ona tusia ai tala.

Lau Afioga i le Fofoga Fetalai, o le isi lenei tomai o lo o galulue ai i latou o le faasalalau o tala ina ia silafia ai e le lautele o le atunuu mea o tutupu. Po o fea lava le tulimanu o le atunuu o lo o tutupu ai, e le gata i tala i vaifanua, ae faapea foi ma tala o atunuu i fafo ina ia nofo silafia ai e tagata uma o le tatou atunuu mea o ttupu. O tala o vaifanua ma tala o le va i fafo.

Lau Afioga i le Fofoga Fetalai, e le na ma le laina le taua tele o le tomai lenei mo i tatou uma. E le gata ia i tatou uma, ae faapea foi i tatou tagata o i fafo. A o le faaautu o le taiala o le tomai lenei, ia sao ona tusia tala. O lea ua tatou matamata ma tatou faitau pea i tala o le lalolagi i isi foi tusitala o lo o latou faia le galuega lenei mo nusipepa tetele o le lalolagi ma Televisi. E suamalie tele ia i latou mea o taua, lea e iu lava ina maliliu ai le toatele. O tagata foi e tusitala, e le gata o i latou ua i ai le tomai faapitoa, a o ni tagata foi e totoa, e le fefe e o i mea o lo o tutupu ai faalavelave, ma o le toatele lava o i latou e maliliu ai, ina ia lipoti mai mea moni, tala moni, ae le o le aumaia o tala pepelo. O i latou foi o isi tagata faipisinisi, aua e faamoemoe le latou foi lumanai o latou ma latou fanau i le maua pea o tala e fiafia i ai tagata. E i ai la taimi e alu alu lava i luga foi o mea nei o le agaga faipisinisi, ona amata loa lea ona sipasipa ese ma taiala, ua sau tala ua felanulanuai, ua le na o mea o tutupu, a ua ofi mai ai ma o latou manatu e le tatau ona felanulanuai se tala. I totonu lava o mea nei o nusipepa, e i ai lava le avanoa e faaali ai lou manatu i lalo o le vaega lea o le faatonu. A lipoti mai tala, e lipoti sao lava, ae faatoa maua le lipoti sao i lou alu e talanoa i e o aafia. O lona uiga o lea mea, a faapea o se taua i le va o ni tagata se toatolu, o Simi, o Kokoaraisa ma Faiiai, e tatau lava ona e alu e interview uma le toatolu, talanoa i le toatolu lea, ona maua ai lea o le tala a latou uma, ona faatoa fau loa lea o lau tala faasalalau, ua i ai uma lava le toatolu. Ona tau loa lea o le mea lena, o lea ua paleni le tala, o lea ua aumai tonu lava le faamatalaga e aafia ai le toatolu. E i ai isi togafiti e fai e le au tusitala, e o muamua faatalanoa le tasi, ia Simi, ona omai loa lea ta, ae sau i lalo le pepelo tele lava, e lapoa le pepelo, e le i mafai ona maua le avanoa e faatalanoa ai le isi toalua, ona oo loa foi lea taeao maua le isi toatasi toe ta, tala atu taeao maua le isi toatasi toe ta, ona maua ai lava lea o le ulutala i aso e tolu i le mea sa tatau ona tasi le ulutala. A o le a le mea e mafua ai? E mafua ona fai na mea sese ona o le tulaga lava lea i le tupe, o le tupe lava lenei e sese uma ai mea uma. A tuu mai la i se tamai atunuu pei o

Samoa, si tamai atunuu lava laitiiti, ae o le mea o le nusipepa, oka oka oka, ma le anoanoai o le mau leitio. Ou te ofo foi au i le tupu o tala. A o mea nei o tala, e aafia ai tagata, e tupu ai le vevesi, aemaise lava pe a le paleni. O lona uiga ua le maua uma faamatalaga i itu uma o lo o aafia. E tupu ai le vevesi, ma o se itu maaleale tele lea i se tamai atunuu pei o Samoa. Aisea? Aua foi e tai aiga uma lava tagata uma, ma e te tusia loa se tala, e i ai le isi vaega e ono fiafia, ae i ai le isi vaega e ono afaina i lau tala lea ua tusi, aemaise lava pe a le paleni. E i ai mafuaaga, o le isi mafuaaga ona ua fai mai lou pule, o taeao le deadline o le tatou pepa, alu loa ma le tala, pe alu ai lava ma se isi mea pepelo e faaalu, ae aafia ai tagata, aafia ai loto ma oo atu ai ina tupu loa ma le vevesi.

O le agaga la o le Tulafono Tau Faaofi lenei, o le taofia o le faatupu vevesi. E i ai isi taimi sa fai ai au interview, a o tofia au o le faasalalau mea a le HRPP. A uma la fono a le Kapeneta, talu ai ona o au o le Minisita o Tupe i lena taimi, pei o lau laulau lea e sau ai le tele o mea, o lena foi la na tofia ai au e le matou Palemia i lena taimi ou te alu e faasalalau pe a uma fono a le Kapeneta, ona ou alu loa lea faasalalau. Ona ou fai atu lea, tau mai lou igoa ina ia silafia uma ai e tagata. O le faatolu ea ona alu le mea ou fai atu i le isi alii, 'ia tau mai lou igoa ma' ae fai mai le tala a le tagata lea, 'e le tau atua lou igoa' ua fefe. O le mea na ou maua, o lea lava ua leva ona sue e se isi tagata le tagata lea, talu ai le tala matuia ua fai fua ai le latou aiga ma faalumalumaina ai. Ona sau lava lea e sue. Ae tilotilo atu la i le matou interview lea, faatoa na iloa ai le tagata tonu lea na tusia le tala. A o le alii lea, la te masani lava ona inu i le RSA, e le malamalama le isi i le isi. Ia alu loa lea faatali mai i le RSA, alu atu loa le Tusitala, 'Ua a ua e sau?' 'I'. 'Ia se i faatau le ta pia.' Tago loa tuu i ai le pia tago foi i lana pia fai mai, 'E te iloa, se o le manaia ia o le polokalame lea a outou anapo, faatoa ou iloa lava o oe lea na ou fiu e sue lea na e tusia le tala lea na afaina ai lou aiga ae sese. E ese lou le alofa, ma o lea la, o le a fai loa le tau' Ia, fasi loa e lea, ona ave lea i uta uaea gutu o si tama. A o le tulaga lena i mea nei o tusigatala, lea tatou te talanoa ai. O se profession e ese le taua latou te tusitusi mai tala, e popoto foi e fai auala e alu atu ai tala. E i ai le taimi e omai ai faasee oe, omai faapea mai, 'ua matou faalogo o le a faatu lau Vaega' ia e alu loa oe i le atoa, ae o la e ua maua le latou tala e sau ai, ae leai e le moni. Ia, o mea faapena, o le atamamai ia e fai mea ia. O le ala la lena, ina ua oo i le 2001, na fai ai lea o le iuga a le Kapeneta ina ia tele ma lava tala e ave mo nai a tatou tusitala aua foi o la e faalagolago i ai le tausiga o latou foi aiga i le latou galuega, uma loa le iuga a le Kapeneta faaalu loa, ae faaaua atu i le Ofisa Faasalalau faapitoa a le Kapeneta ma faaalu i nusipepa uma lava ma leitio. O lea la tou te silasila i ai talu ona faatu mai lena itutino o le tatou Malo mai lava i le 2001, o lea la ua faia ai e le Malo le mea lea e fesoasoani ai i le Au Tusitala ina ia maua pea tala mo a latou nusipepa, tala e anoa, tala e le aivaa, ae alu atu i luga o tusitusiga mai totonu o le Ofisa o le Kapeneta, e le mafai ai ona nofonofo lava se isi ma fatufatu nisi ana mea faaopopo, ma atili ai ona milomilo tala.

O le tulaga lautele lena lau Afioga i le Fofoga Fetalai lea e mafua ai le taumafaiga lenei. O se taumafaiga e fesoasoani ai i le Au Tusitala. O le galuega atoa la a le Fono lea e faatu, o le Fono a le Au Tusitala, ina ia mafai ai ona faatu le latou Fono lenei, e i ai foi ma le Executive Committee, e mafai foi ona latou suesuea ni faitioga ua avatu ona ua faaogasese e se tusitala lona malosia faa-tusitala e ave ai ni tala le moni, ona fai ai lea o faaiuga, ma o

faaiuga foi ia latou te faia, o lea ua i ai le malosi o le Tulafono Tau Faaofi e aumai i totonu iinei, o lea ua atoa i totonu o le pepa lenei. Ua leva ona tusia le Tulafono Tau Faaofi, ma sa mafai ona tuu atu le avanoa e faatalanoa ai ma le Au Tusitala, aua o le Au Tusitala foi latou, e le o ni tagata e faigofie, ona e i ai le latou mau foi lele, o lo o ia i latou le saolotoga e faaali saoloto ai o latou taofi e aunoa ma le taotaomia. O lona uiga o le a lava le tala e latou te tusia, e le tatau ona faalavelaveina. O le tulaga taua o le itu lea, ua uma ona taoto nisi o faamasinoga tetele na faafoe e le Malo, ona o ni tala le faavaea sa tuuaia ai le tatou Palemia talu ai. O le matua maoae o tala sa tusia e faapea e faavae i luga o se saunoaga a le Palemia na fai i totonu o le Palemene lenei, ae le faavaea, ona e le i saunoa ai le Palemia i se tulaga faapea. Ina ua tuliloa le mataupu lenei, sa tutumau pea le tusitala sa faalogo i ai, sa faalogo i ai i le saunoaga lea. E sue atu i totonu o tatou faamaumauga, e leai lava ma se mea faapena sa tusia ai. Ia, o le mea la lena sa oo i totonu o le Faamasinoga, e faamaonia pe sa saunoa le Palemia i le saunoaga lea e fai mai ai le tusitala, o mea o lo o ou tusia atu i i, o mea na saunoa i ai le Palemia. Ia, e mafai lava la ona tuuaia faapea, po ua aveese ma faamaumauga a le Palemene. A ia manatua foi, lau Afioga i le Fofoga Fetalai, o faamaumauga a le Palemene, e le mafai ona suia, e uma loa lava ona saunoa le sui usufono, o la e ua uma ona pue i tatou masini faamau leo, ona ta sao loa lea i totonu ma aumai faamaumauga. o saunoaga ia na saunoa i ai le sui usufono. O le fesili la a le Faamasinoga, e fitoitonu le Fono lea i le tausaga 1996, o le a le taimi, o le a le masina, ina ua faagasolo le Faamasinoga. Alu atu le tali, 'Tesema'. 'O le a le aso?' Tau le aso. 'Sa e faamaumauina?' 'Ioe, sa ou faamaumauina i lau tusi.' Le tusi lava lea e fealuai ma le tusitala a faatalanoa oe ona faamaumau ai lea o vaega e faavae ai lana tala o le a alu e tusi. O le fesili; 'O lena la e ia te oe le tusi?' 'Leai.' 'O fea o i ai le tusi?' 'Ua mu le tusi.' 'Mu i le a a?' 'Mu i le afi.' 'O le a le masina na tupu ai le afi?' 'Na tupu le afi i le masina o Aperila' 'I le a le tausaga?' '1996'. Ona fai mai lea o le Faamasino? O lena la sa faamaumau o le lauga na fai ia Tesema o le 1996, a o lau faamaumauga na e faamaumau i tusi na, a o lau tusi na mu i le afi ia Aperila 1996, e le i oo ia Tesema. O le iuga lena o le faamasinoga, na faamaonia ai le le amiotonu o le faasalalauga na faaleaga ai le Palemia. E i ai ma le faamasinoga lona lua, le isi foi tusitusiga i le nusipepa lava lea na toe ave ai foi le mataupu. Ua ou taua le itu lea, ona o le vaega tonu lava lea sa sailiili ai le aiatatau a lea e tautu i ai latou le Au Tusitala. O le aiatatau la lena lea sa sailiili uma lava i le faamasinoga. E matautia lea faamasinoga, ua le faia muamua le faamasinoga e le Faamasinoga Maua luga a ua lote muamua le mataupu i le Faamasinoga o Talosaga i luga o le talosaga e faapea; Ona o le mataupu tau le aiatatau, o le mataupu e aafia ai aia o lo o i lalo o le Faavae, e le tatau la ona lotea muamua e le Faamasinoga Maua luga, ae tatau ona ave muamua e lotea e le Faamasinoga o Talosaga, o lena la sa ave ai loa i le Faamasinoga o Talosaga. O se mea maoae lena mea. Ona avatu loa lea o mau a itu e lua, o le iuga lenei na fai, o le matua mafiafia o le iuga, ae o le iuga e faapea; "E leai se mea e igoa o se aia atoatoa e te saoloto ai e faaali ni ou taofi." O lona uiga e leai se absolute right to freedom of expression. E leai lava ma se isi e atoa i ai se aia faapena i lalo o le Faavae. O le mea la e tau mai e le Faavae; a faaoga lau aiatatau ia e faaeteete i le faaogaina o lau aiatatau. A faaoga loa lau aiatatau ae aafia le aiatatau a le isi tagata, ona e toaga lea e tapena ane ni au solo e solo ai lou afu pe a oo ina tagofia oe i le vevela o le mataupu. Aua o le iuga

lena o le Faamasinoga, there is against the answer. E tatau, o lea ua faamaonia ua aafia le aiatatau a le Palemia i le mea o le aiatatau soona fai faavalevatea, ma ua faatonuina loa e le Faamasinoga Maua e faagasolo le faamasinoga, ma ua tau mai i ina ua uma le iuga.

Lau Afioga i le Fofoga Fetalai, o le mea o lo o ou taumafai e faamatalaina atu, ona o i lea sa soona fai ai le mea o le aia tatau faavalevatea e le au tusitala, e leai se isi e saoloto e i ai se saolotoga atoatoa, a fai lau aia tatau e soona faaali ai ou taofi, ia fai fuafua ina ne i afaina se aia tatau o se isi ona e nofo sauniuni loa lea i le anoano o puapuaga o le a oo ia te oe.

Lau Afioga i le Fofoga Fetalai, o i ina lea e faavae ai le Tulafono Tau Faaofi lenei, ina ia faatonutonu tatau ai le amio a i latou o le au tusitala ina ia avea i latou o professional journalist ia professional i le faatinoina o le latou galuega. E le i mamao atu i nai masina talu ai na faasalalau mai ai ia le faatulagana o le lalolagi o lea atunuu ma lea atunuu i le tulaga o le saolotoga o le aufai-nusipepa latou o le au tusitala, ua faatulaga ai Samoa i le maua o le saolotoga o lo o i ai i le numera 40, ae faatulaga ia Amerika i le numera 45, o lona uiga, e sili atu le saolotoga o tusitala o lo o latou aeae ai i totonu o Samoa nai lo Amerika i le Malo o Amerika, o lo o laulauvivilu i le freedom i le saolotoga le aia tatau o le saolotoga e faaali ai taofi. A o lalo lava i le selau ma ona tupu, e maua uma ai isi atunuu o le Pasefika e ese ai Niu Sila ma Ausetalia, i lalo lava i le selau ma ona tupu e maua ai isi atunuu o le Pasefika. O lona uiga o le matua maoae o le tulaga taofiofi o lo o i ai Samoa i le faatulaga atu i isi atunuu o le Pasefika i le itu lava o le saolotoga o i latou o le au tusitala i le faatinoga o latou tiute.

Lau Afioga i le Fofoga Fetalai, ia o le tala atoa lena o le tatou Tulafono Tau Faaofi ma le faapogai ua ala ai ona fai. E toatele o tatou tagata e taumafai e mānanā ina ia faasao le faaleagaina o latou igoa ona o ni tusitusiga ma ni faasalalaua lē faavae i luga o taiala tatau ma paleni o tala, a o le faafitauli tele lava lea na tatou talanoa ai i le taeao, e alu atu e faafeagai ma le loia, ae tau mai, e \$30,000 e tatau ona totogi muamua, e oki ai lava i ina le mataupu, ia ona alu ai lava lea o faiga a le au tusitala. A o i, a i ai loa sina au mataupu, pau lava le mea o lou tusi, ave loa i o, na o sina au tusi lava e logo ai ia le fono o le nusipepa lea le article lea, lea ua faaleaga ai au ma lou aiga, ia ona tagofia loa lea o suesuega fai loa i ai iuga a le tatou Fono Faapitoa lenei faatonutonu ai le amio faapena foi ma le tomai a le au tusitala.

Lau Afioga i le Fofoga Fetalai, ia o si tamai Tulafono lena ma le faavae atoa lena o tatou Tulafono ua i lumamea nei, soifua ma ia manuia.

FOFOGA FETALAI: Malo faafetai saunoa i lau Afioga i le Taitai o le Malo. Ia e manatu ua.....Ia o le a avatu pea le avanoa i a tatou tulaga masani, tulai mai le Afioga i le sui usufono mo Falealupo.

Afioga Hon AEAU PENIAMINA LEAVASEETA: Lau Afioga i le Fofoga Fetalai ma le pau o le Fonotaga a le Palemene, ou te tulai atu lava ma le ava e tatau ai ma le faaaloalo e fia avatu se tuualalo e tusa ai ma le Tulafono Tau Faaofi matagofie tele, aemaise lava le saunoaga a le Afioga i le Palemia, o ia foi lea e fitoitonu ma lenei Tulafono taua, o le matua taua o le Tulafono Tau Faaofi, ona o le fatu lea i so o se temokarasi i le faailoa i le atunuu. Ma i le saunoaga a le Afioga i le Palemia, o le matua tauave, o le aia tatau. Ua saunoa ua faafofoga lelei le Maota Fono i ituaiga aia tatau amanaia,

faaaloologia, tausia, puipuia ma isi lava tulaga uma, faafetai, atonu o lea ua manino le faafofogaaga.

Na o se faafesili lava i le tatou mataupu lau Afioga mo mea nei o aia tatau, aua o faalapotopotoga uma nei e pei uma lava e i ai le vaega, o le faafesili lea, pei ua tau le....so o se faalapotopotoga lava a i latou e professions uma e fai a latou sosaiete, ae i ai la sosaiete autu foi lea e vaaia e le Malo le Council, a o mea nei o Sosaiete pei e tuu lava i le pulega a i latou e fitoitonu i ai, medical associationsso o se association, ae pei la o i, o lea la ua i ai ma le JAWS, haven't should be i le tulaga o le Tulafono, o lea la ua i lalo nei o le Malo, but any have a Council, o le mea la lea e tau faafesili atu ai, e i ai se journalist association a Niu Sila po o se isi malo? Faapea lava au e pulea, o le manaia ia o le folasaga e pulea faasalalauga ma solitulafono ma le gaogaosa o ia mea o tala. E i ai la le vaega lea o le sosaiete e i ai foi nai a latou....le au tusitala, ae i ai la tulafono a le Malo e faapitoa lava mo le vaaiga o le sosaiete lea pe a sese, aumai loa i le tulafono, a, o lea la e i ai le JAWS le Journalist Council, lea foi la e aumai i i le Tulafono ae aumai faatasi ai ma le Sosaiete. Ou te manatua lau....ia tulou sa tau fai atu lava lau tala i le Peresetene o le JAWS lea sa i i le ofisa lea o le Afioga i le Palemia, ou te le iloa po o i ina e sau ai le fausaga lea o le tuufaatasi o mea ia e lua, o le taua o le mea leni o le saolotoga lea na folasia lelei ma matua maua lelei le ogaoga o le loloto o le taua o le faamatalaga o le freedom of expression, e taua tele. O lea la e tau fesiligia e lou mafaufau lau Afioga, leaga e lua mea ia o le a pulea e le Malo e i ai i totonu o le lio a le Malo, o le associations o latou nei e fai o tusitala atoa ai ma le Council.

Lau Afioga i le Fofoga Fetalai, o le mea e tau popole ai se talitonuga, afai e i i mea ia, e faigofie lava ona faapea, aua ne i soona fai se tala a se isi o lea e i lalo uma o le Malo mea. O ai e i ai i i le vaega lea, a o ai e i ai i i le Faamasinoga? A outou pulea le ulu ma le ogatotonu ma le siusiu, ae o a la isi mea e tau fai e isi.....? O le fesili lea.

Lau Afioga i le Fofoga Fetalai, leaga o le mea lea e ono tupu ai le....aua o le mea lea o le a aliali mai nei, o le a le sao lelei se tala pe moni, is a solid jurisdiction of the Government, o le aualii uma lava ia e i ai i totonu i i, faaeteete lava a outou tala seiloga ou te fai atu faatoa alu lea o se faamatalaga, o nai mea faapena. O mea uma ia ou te fai atu nei e laititi e faale ono tutupu ae tutupu, ae a tupu la, ia o i ina la tatou te oo ai i se tulaga matautia. E sili le puipuia nai lo le togafitia.

Lau Afioga o le tele ia o manatu atonu o lea e tofu uma lava le mamalu nei ma le lagona i le tulaga lea a o lea e fenumiai, ae pei o le faatofalaiga, pau le mea o le a tupu ai i i, o le a matua fefefe uma lava tagata e faitatala pe a i lalo uma o le Pulega e lua mea o lea o le a pulea i i. Tuu le avanoa le aia tatau i le tagata e faatino ai le latou galuega, ae aua le uua luga ma autafa, lau Afioga ua lava i i se manatu. Faafetai, manuia le Fono.

FOFOGA FETALAI: Malo o lea ua maua le finagalo o le sui usufono. Ia se i tuu atu le avanoa i le.....

Tofa Hon Tolofuaivalelei Falemoe Leiataua: Lau Afioga i le Fofoga Fetalai ona o lea ua fesili le sui usufono matua lea, masalo po o ua 6 paeaiga a le toeaina ae na pau i le isi taimi, ae na i ai le taimi na pau ai, o le faaliliuina

lena o lau tala, e le o le pau foi lele o le faaiipoipoga a o le pau ua le toe tulai mai i le palota.

Ae na ona ou fesoasoani atu ona o lea e mamafa i le toeaina le upu lea o le freedom of expression, po o le aia tatau e faaali ai lou finagalo. Ae a tilotilo le sui usufono mamalu i le article 13 po o le fuaiupu 13 o le Faavae, ona toe tilotilo lea i le a lena e faapea mai; 'i le saolotoga o le tautala ma le faaaliga o taofi,' ona e toe silasila loa lea i le fuaiupu e 2; e leai se mea i le faafuaiupu a, le a la lea e te saunoa i ai ma mamafa i ai lou finagalo, o le fuaiupu 1 o le aafia ai le faagaioiina o so o se Tulafono o lo o i ai nei pe taofia ai le Malo, mai le faiga o so o se Tulafono i so o se itu e avea ai le tuuina atu e lena Tulafono o lo o i ai nei po o le Tulafono ua faapea ona faia, o taofiofiga tatau i le faaaogāina o le aia tatau, na tuuina atu e tusa ma aiaiga o lena faafuaiupu e tuu atu ai le saogalemu i le atunuu." A e silasila i le faa-Peretania o le manino ia:- "E le noatia le Malo i le faia o ni Tulafono e puipuia ai le tulaga o le soona lafo o upu." O le aia tatau lena. Ia ma lou faaaloalo.

FOFOGA FETALAI: Malo. Le sui usufono mo Aana Alofi Nu. 3, ona sosoo ai lea ma le sui usufono mo Faleata Sisifo.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa, e faafetai atu foi i le Afioga i le Palemia mo le faamalamalamaina o le Tulafono Tau Faaofi.

Lau Afioga i le Fofoga Fetalai, muamua e lagolagoina e lou sui usufono le vaega o le Tulafono e faatuina ai le Media Council, ona o vaega pei ona faaalua e le Afioga i le Palemia le taua tele o le i ai o se vaega e mafai ona vaavaaia foi ma fuafuaina le faasalalauina o faamatalaga i totonu o le atunuu, e le gata o tagata taitoatasi ae faapea foi le lautele o le tatou atunuu.

Lau Afioga i le Fofoga Fetalai, e i ai se talitonuga i lou nei sui usufono, e le tatau ona i ai i totonu o le Tulafono le vaega lea o le JAWS, pei ona faaalua foi e se tasi o sui usufono ua maea, o lou talitonuga o le Faalapotopotoga lea o Tusitala e tatau ona aveese mai ae focus le tatou Tulafono i le vaaia o le Council, ia le na o tagata tusitala a o isi media outlets uma o lo o i ai, o le taua lea o le fai o le Council o latou lea e oversee ina, e pei foi o nisi faalapotopotoga o inisinia, o loia o lo o eseese uma profession, a o le Council lea e i ai le faamalumaluga i le Tulafono, pau lea o le vaega e tatau ona taua le...o le tatou Tulafono.

Ona ou see mai ai lea lau Afioga i le Fofoga Fetalai i nisi o vaega o le media council ou te talitonu e ao ona toe tagatagai i ai o le Tulafono. Muamua lau Afioga e i ai le vaega o lo o faasau ai i totonu ou te talitonu e le tatau ona tuuina ai, o le vaega lea e faapea, e avatu tupe e le Malo e faatino ai tiute o le Council. Ua maitauina o faalapotopotoga uma o lo o i ai i totonu o special law society pei foi ona maea ona tatou talanoaina o le Asosi o Fomai, Sosaiete a Inisinia, o lo o faatupeina lava e i latou. Peitai o le faalapotopotoga lenei o le Media Council, o lea e fai mai e avatu tupe mai le Malo e fesoasoani i le faatinoina o latou tiute. O le talitonuga lau Afioga afai o se naunautai ia ao lava ona faatupe e i latou.

O le tasi lea o vaega lau Afioga i le Fofoga Fetalai, muamua e le o i ai se definition o le mea e tau o le Council o le Media i totonu o le Tulafono. O lou talitonuga e tatau ona i ai i totonu interpretation po o le definition ae leai ma se mea o le Tulafono e tau mai ai, po o le a le mea e tau o le Media, pe lavea

ai ia tagata tusitala, o tagata fai TV, o tagata initaneti. Ou te talitonu lau Afioga, e ao ona faamalamalama mai i i, ona e taua foi lea ona e faitauina i le Tulafono ina ia iloa tonu, po o i ai ituaiga tagata o lo o patino i ai lea Tulafono.

Lau Afioga i le Fofoga Fetalai o le isi vaega taua o lau vaavaai atu i ai i le Tulafono Tau Faaofi, o le faaiuga i se tagata e avatu se Tagi po o se tagata e faatu agai i se isi o le au tusitala po o le media, o faasalaga e i ai o le ave e faatoese pe faasalalau se faatoesega, po o le laitiiti ifo i le 50 penalty points. E talitonu lau Afioga i le Fofoga Fetalai, e ao ona toe iloilo lea vaega, ona o le tele....afai o le faasalaga lea e ave i se tusitala, ou te talitonu lau Afioga ia e atili ai ona alualu i luga le lē lelei o le auaunaga a Tusitala ona o lea e iloa, afai la pau le mea ia fai lau faasalalau e faatoese ai, e sao e sese oe, a o le tele o isi soligatulafono i nisi foi o sosaiete, ia o lo o mamafa ia faasalaga o i ai.

Lau Afioga i le Fofoga Fetalai, ou te talitonu e ao ona toe silasila i ai i faasalaga talafeagai. E le gata foi i lea aemaise lava ia taofiofi ai vaega o lo o faapea ona saunao i ai le Afioga i le Palemia ma o tatou vaai atu i ai i nisi o faamaumauga.

Lau Afioga i le Fofoga Fetalai, ona ou see mai laia i le vaega lea o le Executive. Ou te talitonu o lo o sau ai i totonu o le Tulafono, ia lima tausaga le loia ia le i lalo ifo o le lima tausaga le loia e mafai ona ave ma taitai, po o se sui i totonu o le media council. O lea faatoa uma nei ona tatou talanoaina le Tulafono Tau Faaofi o Loia e mafai ona private practice ma Loia e mafai ona i totonu o le Community Centre, o le valu ma le fitu tausaga, peitai ane ua na o le lima tausaga, ia e le i mafai ona private practice nei Loia, ou te talitonu foi, e ao ona toe tagai i ai i se tausaga talafeagai ia mafai ai ona aumai i totonu o le Council se loia ua lava lona tomai pe equal foi i 8 tausaga o lo o i ai ona mafai lea ona private practice. Ia ma nisi foi e ao ona faamaioio ai i media representatives e toalima o lo o i ai i totonu o le Tulafono Tau Faaofi. E ao i lou talitonuga lau Afioga i le Fofoga Fetalai ona maioio mai ituaiga media outlets e filifili mai ai o latou sui.

O se fesoasoani atu lea lau Afioga i le Fofoga Fetalai.

FOFOGA FETALAI: Malo faafetai. Ia, tulai maia lau Afioga i le sui usufono mo Faasaleleaga Nu.2.

Susuga PAPANII LIO FAAVAIVAIOMANU TAEU MASIPAU: Faafetai i lau Afioga i le Fofoga Fetalai mo le avanoa. Atonu o lea ua manino le folasaga a le Taitai o le Malo i le aoga ma le taua o lenei Tulafono Tau Faaofi aemaise lava i latou ia o le Au Tusitala. E talitonu foi e i ai nai manatu e fia tuualalo atu ai aua le faamoemoe o lenei Tulafono Tau Faaofi.

O le agaga e fia avatu i luma o le Maota lau Afioga i le Fofoga Fetalai, o le faatuatuaga i le Au Tusitala po o le au faasalalau aua o lea ua saunao manino le Palemia, e tasi lenei profession taua ma ou te ioe foi i ai. E pei o le agaga o se taofi ona o le faatulai mai o le Fono a le Au Tusitala po o le Media Council. E pei ua mafua ona faatulai mai ona o faasea a nisi ua aafia i tusitusiga a le Au Tusitala. O lea foi la ua aumai ai ma le Sosaiete a Loia ma ua fesiligia ai pe aisea ua le ave ai le faatuatuaga ma le faamuamua i le Sosaiete a Loia, a o lea e pei ua ave le faamuamua i le Sosaiete a le Au Tusitala, aua e ao ona silasila i mea nei o faasea aua o faasea e saunia

ma...code of practice e saunia e le Au Tusitala. O faasea foi la e fua i luga o faasea i a latou code of practice. O lona uiga o la lava e silafia e le Au Tusitala aua o i latou na fausiaina.

O le agaga o se manatu o le faatuatuaga mo i latou, le Au Tusitala ina ia iloilo muamua e le Sosaiete lea, aua o le Sosaiete lea o lea e i ai le latou Executive Committee lea e i ai le Peresetene, le Sui Peresetene ma tulaga tofi uma, aua o i ina e iloilo ina ai ona e tatau ona ave pea le faatuatuaga ma le faamuamua ia i latou e ona lea poto faapitoa ina ia latou suesueina. E pei lava foi o le Tulafono a Loia lea na uma atu nei, o le Sosaiete lava a Loia e ave i ai faasea ma fai e latou faaiuga. E pei o le agaga lena o se manatu, pe o le a le mea ua fai ese ai faapea le Au Tusitala ona o lea e pei ua faamuamua mai le Media Council ae faamulimuli mai le latou Sosaiete. E pei o le agaga lena o lea e tau manatu i ai, ona o se faatuatuaga. E tatau foi ona ave i lea foi vaega auaunaga ina ia faatino pea e latou. E oo lava i a latou suesuega ma mea uma lava e faatino lava e latou.

Aua o le Tulafono a Loia lea na uma atu nei, a faapea ua le gafatia ma le faatinoina e le Sosaiete se faaiuga, ia fai loa se isi body e toe agai i ai. E pei o le agaga lena, o le faatuatuaga i lea matafaioi taua. E taua mo le faasalalauina aua le silafia lautele, ae sao foi le saunoaga a le Taitai o le Malo e ao ona fai fuafua, ae ia muamua ona silasila i ai le Sosaiete ma le Komiti o le Sosaiete ona faatoa faatino ai lea o faasea.

O lona lua o manatu, a silasila nei la i le fono a le Au Tusitala po o le Media Council, e toa 11 sui auai. A silasila i ai e toa 6 i latou e le o ni tusitala, ae toa 5 tusitala. O lea e auai ma sui o nuu ma afioaga lea e sau i totonu o le Tulafono Tau Faaofi lenei. O le fesili ne i fai...mo se faataitaiga, afai nei la se fono ae toaitiiti tusitala ae toatele sui o nuu ma afioaga e faia se faaiuga, e le fetau ma o mea faapena e faaono tutupu. E tau vaavaai molimoli atu faapena se manatu ona o le agaga ina ia talafeagai ma ia lelei atoatoa mea uma. E oo lava i suesuega o faasea ma mea uma, e tatau lava ona lava sailiiliga ma ia lava foi le silafia a i latou faapitoa i lea matata ina ia maua se faaiuga talafeagai ma fetau.

E pei foi ona laga e nisi sui usofono, o lea o le a faatupe e le Malo fuafuaga nei aua o le mea moni lava ia, e pei foi o isi Sosaiete na uma atu nei, e le mafai ona faatupe e le Malo, a o la e faatupe lava a latou fuafuaga e a latou Sosaiete, a o lea ua faatulai mai lea Sosaiete e pei o lea o le a faatupe e le Malo. O se manatu lena e ao ona faasaoina mai a tatou seleni.

O le sao lena i lenei foi Tulafono Tau Faaofi.

FOFOGA FETALAI: Malo faafetai. Tulai mai le sui usufono mo Faleata Sisifo.

Tofa LEALAILEPULE RIMONI AIAFI. Faafetai lava i lau Afioga i le Fofoga Fetalai mo le avanoa ma e faafetai foi i le Afioga i le Palemia mo lenei Tulafono Tau Faaofi.

So o se saolotoga lava e i ai ona tapulaa. E le faapea e tuu saoloto i so o se mea lava, ae e ao lava ona i ai sina control. E tatau foi ona mautinoa, tatou te le o taumafai e punipuni pe taofiofi ni finagalo faaalua, ae ia faaali i le agaga e tonu ma sao e fai ai. Ua fetau lava le talanoaga o le mataupu lenei ma le mea lea ou te fiafia i ai i le aso lenei. Na ou usu mai i le taeao ae talie atu faipule ma le Taitai o le Itu Agai ia te au ma fai mai, "Sole, a e sau i le Fono o lena

ua aveese lou matai?” Na ou fai atu pe ua aveese e ai, ae fai mai, “Na sau faasalalauga i le televise anapo ma le nusipepa, na aumai faapito ai lava i luga lou igoa i le lisi e faapea ua aveese lou suafa matai.” Na ou fai atu, “O ai lena le mafaufau ua ia faia lena faasalalauga e aveese lou matai.”

O le mea matautia lea ou te talanoa atu ai, irresponsible reporting. E tele le aafiaga, ae ona o au o le tagata loto faamagalo ma ou te thrive i mea nei o challenges ou te le popole i ai. A o le mea lea e fai atu ai nei, sa tatau i le Televise Samoa i le taimi o le a fai a latou faasalalauga ona valaau atu au pe tapa foi se faaiuga a le Faamasinoga po o le Land and Titles Court pe moni faasalalauga ia e alu atu ma lea tagata. Aua e le faapea e tafao, tafao lava lea tagata i le auala sau alu atu ma le faasalalauga faapea ua aveese le matai o ai ma ai ma Lafai. Ua nonofo lava latou ma faasalalau, ae e le gata foi i le televise a o nusipepa. O lea na ou fai atu nei i le sui usufono mo Faasaleleaga Nu 2.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: E fia fesili atu lau Afioga i le Fofoga Fetalai.....

FOFOGA FETALAI: Malie le sui usufono.....

Susuga Hon Tuilaepa Fatialofa Lupesoliai Aiono Neioti Sailele Malielegaoui. O lona uiga o le tagata na faia le faasalalauga o se tagata tafaovale?

Tofa LEALAILEPULE RIMONI AIAFI: E le gata ina tafaovale ae ma’i.

FOFOGA FETALAI: Ou te fautua atu i le sui usufono mamalu. Silasila foi, na ala ona ou tuuina atu le avanoa....o lea o le a oo ina iloa le tagata lea sa faia fuafuaga ia, ae ou te puipui foi i Tulafono Tumau aemaise o aiatatau a i latou e le mafai ona tali mai i taimi o a tatou Fonotaga.

Le sui usufono mo Faleata Sisifo, o lo o i ina le tofa ma le faautautaga i lau Afioga. O mataupu tau lotoifale e ia te oe lava ia ma lou itumalo. E fofo lava e le alamea le alamea, ae ou te manatu ona o lea ua tatou tu lalata i lo tatou taimi malolo. E momoli atu le faafetai tele i le paia ma le mamalu o le Maota i lenei vaega o le aso. E toe faaauau lau lauga pe a tatou toe foi mai taeao.

E i ai le agaga ua tele ma anoanoai sao taua i le faatulai mai o a tatou galuega i lenei aso. Ua tele a tatou Tulafono ua pasia aloaia le faitauga faatolu ma ua tele foi ma anoanoai a tatou Tulafono ua faitau faalua. O lea foi ua tatou agai e lauliliuina nisi o Tulafono Tau Faaofi taua e pei ona i ai le Tulafono Tau Faaofi lenei o lo o auga i ai le finagalo o le Taitai o le Itu Agai aua o le uo mamae a Ofisa Faasalalau faapea foi ma le Sui Taitai, ona e fiafia tele e agai i o, a le malilie atu i inei ona o lea i o. E ui i lea e faafetai atu i o outou sao taua i lenei vaega o le aso.

E momoli atu foi le faafetai tele i le paia ma le mamalu ua tatou faatasi i Faauluuluga o Matagaluega ma Faalapotopotoga a le Malo, malo i lo outou agai mai aua le faamaopopoina o a tatou galuega.

E faamanatu atu o lea sa taua ananafi o nei la tatou puega-ata. O le faamoemoe ina ia fai ma a tatou records i tulaga masani ona e le taupule se isi o tatou ma le finagalo o le Atua. O lea foi ua fai i lagi le folauga a nisi o tama na tatou galulue faatasi, ae e le i maua ni o latou ata i le taimi o tatou

Fonotaga. O le tatou ata aloaia lea ua faatulaga pe a maea la tatou Fonotaga nei, o le ata atoa mo le tatou Maota Fono e aofia ai le Palemene atoa, ona agai ai lea e pue le ata o le Taitai o le Malo ma le Kapeneta, o Vaega Faaupufai, ona faasolo mai ai lea i a tatou Parliamentary Committees.

O lo o ua i ai le faamoemoe e tatalo atu ai ina ia onosai mai lo tatou Maota ona o lo o taumafai e pue uma ata o Taitaifono ma a outou Komiti e amata mai lava i le Komiti o Tulafono Tumau o lo o aofia ai au, le Taitai o le Malo ma nisi o le Maota, Privileges and Ethics Committee, Komiti o Tupe Maua ma Tupe Totogi, Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai, Komiti o Mataupu tau Aoga, Saienisi, Fesootaiga ma Faamatalaga Tekonolosi, Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa, Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa, Komiti o Faafoega tau Pulega a le Malo, Komiti o Galuega, Felauaiga & Siosiomaga, Komiti o Mataupu tau le Va i Fafo, Fefaatauaiga ma Tupe Maua, Komiti mo le Toe Iloiloga o Tulafono Faatonutonu ma le Komiti mo Ofisa o le Palemene.

O le agaga ma le faamoemoe, o le fia faamauina pea i Faamaumaga a le Palemene ina ia maua ai taimi sa outou alofaiva ai ma tatou galulue faatasi ai i lenei Paeiga.

O le a faaiu le Fonotaga, e tatalo atu ai i le Afioga i le sui usufono mo Falelatai ma Samatau, lau susuga i le Alii Aoao e fai mai se tatou tatalo e faaiu ai le tatou Fonotaga, ona tatou malolo ai lea.

Na motusia Felafolafoaiga ina ua tolopo Taulumaa a le Fono Aoao i le itula e 1:02 i le aoauli seia aulia le itula e 9:00 i le taeao o le Aso Tofi, 23 Oketopa 2014.